

胡氏書畫考三種

南薰殿舊藏古帝王聖賢圖像附以內務府廣儲司茶庫收貯歷代功臣各像凡冊卷軸一百二十有一爲像大小五百八十一有三可謂富矣乾隆戊辰歲

高廟詔重裝池櫝以香楠毀以文緞帝后像黃表朱裏臣工像朱表青裏尊卑區別秩然不紊裝成經進

御覽時用樂用綵亭導入

飭令所司每歲夏月抖晾棟宇森邃局鐫謹嚴慎重儲藏典至懋也嘉慶乙亥歲

皇上命纂入石渠

頒發各圖像畀

臣

等入翰林恭閱同人閱至元后冠飾託爲見

所未見敬

援往牘粗述所知謬許淹通遂屬

敬

一手參攷舊例

首冊而軸居殿

敬

竊謂軸各一像攷證得專冊合衆像若一一

攷之慮繁冗不能明晰宜先軸則冊中之複見者可無事加案

也時方秋爽內官助爲展軸量度尺寸

敬

執筆諦視展軸不踰

晷

敬

筆亦不停綴也軸自唐以前無后像卽帝像之存者亦無

幾宋帝后像以有景靈天章洎諸寺觀崇奉之所凡載在宋史  
文獻通攷諸書者綦詳明代像雖存而崇奉尊藏典禮闕畧一  
二散見於記載者甚寥寥卷中所攷繁簡不同由取資有豐嗇  
也元代服制史冊失紀攷元自中葉以後凡朝祭之服參用唐  
宋制度而舊俗要未嘗廢圖中鉞笠罽姑猶存本色按圖覈實  
補史闕文故攷索不憚詳盡也若夫古聖賢及文武臣工像設  
灼然寫于鴻都泐于禮殿臺于南宮閣于凌煙壁于景靈之廡  
與夫流傳名筆表著生祠者亦各絹楮區分廣袤度測竝徧檢  
譜錄追溯時代以證明續像之所自來惟是下學拘墟見聞淺

陋未能仰副

大聖人以古鑒以人鑒帝範臣軌合撰同符左圖右書  
垂象作則之至意叨忝

恩遇斯誠負疚于心者焉

嘉慶二十一年歲在丙子仲冬望日胡敬謹識



南薰殿圖像攷目錄

卷上

伏羲帝堯夏禹商湯周武像五軸

梁武帝像一軸

唐高祖像一軸

唐太宗像一軸

後唐莊宗像一軸

宋宣祖像二軸

宋太祖像四軸

宋太宗像一軸

宋眞宗像二軸

宋仁宗像一軸

宋英宗像二軸

宋神宗像二軸

宋哲宗像一軸

宋徽宗像二軸

宋欽宗像二軸

宋高宗像一軸

宋孝宗像一軸

宋光宗像一軸

宋寧宗像一軸

宋理宗像二軸

宋度宗像一軸

宋宣祖后像一軸

宋眞宗后像一軸

宋仁宗后像一軸

宋英宗后像一軸

宋神宗后像一軸

宋哲宗后像一軸

宋徽宗后像一軸

宋欽宗后像一軸

宋高宗后像一軸

宋光宗后像一軸

宋寧宗后像一軸

明太祖像十二軸

明成祖像一軸



明仁宗像一軸

明宣宗像三軸

明英宗像一軸

明憲宗像一軸

明孝宗像一軸

明武宗像一軸

明世宗像一軸

明穆宗像一軸

明神宗像一軸

明光宗像一軸

明熹宗像二軸

明興獻王像二軸

明孝慈高皇后像一軸

漢韓信像一軸

漢張良像一軸

漢周亞夫像一軸

漢寇恂像一軸

漢岑彭像一軸

漢祭遵像一軸

漢班超像一軸

漢諸葛亮像一軸

漢張飛像一軸

秦王猛像一軸

唐李孝恭像一軸

唐尉遲敬德像一軸

唐薛仁貴像一軸

唐狄仁傑像一軸

唐郭子儀像一軸

唐李光弼像一軸

唐李晟像一軸

唐李克用像一軸

宋范仲淹像一軸

宋岳飛像一軸

明姚廣孝像一軸

卷下

歷代帝王像一冊

宋代帝像一冊

宋代后像一冊

元代帝像一冊

元代后像一冊

元代后妃太子像一冊

明代帝后像上冊

明代帝后像下冊

至聖先賢像一冊

聖君賢臣像一冊

歷代聖賢像一冊

歷代聖賢名人像一冊

唐名臣像一冊

唐宋名臣像一冊

歷代武臣像一冊

明太祖御筆二冊

明宣宗行樂圖一卷

明人畫出警圖一卷

明人畫入蹕圖一卷

南薰殿圖像攷卷上



預脩 祕殿珠林 石渠寶笈三編唐文明鑑總纂翰林院編脩胡敬謹輯

伏羲帝堯夏禹商湯周武像五軸 絹本一縱七尺八寸橫三尺四寸七分設色畫伏羲坐像高四尺三寸散髮披鹿皮足下右圖龜左圖八卦款臣馬麟畫上方楷書叙贊叙曰朕獲承祖宗右文之緒祇遙燕謀日奉慈極萬幾餘閒博求載籍推迹道統之傳自伏羲迄於孟子凡達而在上其道行窮而在下其教明採其大指各爲之讚雖未能探賾精微姑以寓尊其所聞之意云爾標題宓犧贊曰繼天立極爲百王先法度肇建道德純全八卦成文三墳不傳無言而化至治自然 一縱七尺七寸六分橫三尺五寸設色畫帝堯立像長五尺一寸二分冠服赤舄上方標題堯贊曰大哉帝堯盛德巍巍垂衣而治光被華夷

聖神文武四岳是咨揖遜之典萬世仰之 一縱七尺八寸二分橫三尺五寸設色畫夏禹王立像長五尺一寸袞冕執圭上方標題禹贊曰克勤于邦烝民乃粒歷數在躬厥中允執惡酒好言九功由立不伐不矜振古莫及 一縱七尺八寸二分橫三尺五寸設色畫商湯王立像長五尺一寸服冕被袞旁有一獸上方標題湯贊曰順天應人本乎仁義以質繼忠匪曰求異盤銘一德桑林六事人紀肇脩垂千萬世 一縱七尺九寸五分橫三尺五寸設色畫周武王立像長四尺九寸簪冠有屋衣裳赤舄上方標題武王贊曰受天眷命繼志前人遐邇悅服偃武脩文惟賢是寶法度彰明建用皇極爰叙彝倫

謹案此五軸惟伏羲像有款有叙後四軸有題贊無款識攷宋史理宗本紀淳祐元年春正月戊申如太學謁孔子

製道統十三贊就賜國子監宣示諸生又玉海載淳祐聖  
賢十三贊叙云萬幾餘閒博求載籍推迹道統之傳自伏  
羲迄於孟子凡達而在上其道行窮而在下其教明各爲  
之贊元年孟春祇謁先聖賜國子監宣示諸生旁注伏羲  
堯舜禹湯文武周孔顏曾子思孟子據此則叙贊爲宋理  
宗所作當時旣以宣示復命繪圖而分書其上像之數當  
如贊數特今止存五耳叙中有日奉慈極語攷宋史理宗  
卽位尊楊皇后曰皇太后詔太后所居殿曰慈明前後凡  
三上尊號寶冊則慈極蓋指楊后言之又伏羲像有臣馬  
麟畫四字攷陳善杭州府志馬麟遠子能世其家爲畫院  
祇候金賚畫史會要馬遠光寧閒待詔是麟之繼遠入畫  
院正當理宗朝五像尺寸略同殆出馬麟一手款稱臣應



是奉詔所作凡圖像例應分紀此五像皆宋理宗題贊皆馬麟一手所繪故合載焉自後圖像俱無繪人姓名款識可攷又案宋書符瑞志湯在亳能脩其德有神牽白狼銜鉤而入商朝則商湯像旁所圖獸當是白狼

梁武帝像一軸 絹本縱二尺二寸二分橫一尺七寸七分設色畫半身像蒼髯簪冠博衣左手摺圭上方標題梁武皇帝收傳印記皇姊珍玩夏

損一半印紫芝堂

謹案梁書武帝紀帝生而有奇異兩髀駢骨頂上隆起有文在右手曰武帝天表秀特軒狀堯姿君臨之符諒非一揆又案米芾畫史稱余得梁武帝像今在趙仲忽處葉助字天祐收蜀范瓊畫梁武帝見誌公圖一幅武帝白冠衣褐又案宋中興館閣續錄載展子虔畫梁武帝像又案明

李汶跋梁楷王羲之書扇圖後云此圖上有皇姊珍玩印  
皇姊者元魯國大長公主也公主於至治二年大集朝賢  
於天慶寺出圖畫三十六卷命各人識之泰定元年袁清  
容爲之記攷元史表世祖女魯國公主囊嘉特章成宗初  
封大長公主

唐高祖像一軸 絹本縱八尺六寸二分橫四尺設色畫立像  
長七尺五寸黑鬚平巾幘絳袍束帶革鞬

謹案舊唐書高祖紀周天和元年生于長安七歲襲唐國  
公及長倜儻豁達有史世良者善相人謂高祖曰公骨法  
非常必爲人主願自愛又案唐書唐儉傳高祖嘗召訪之  
儉曰公日角龍廷李協圖讖係天下望久矣又案陳耀文  
天中記唐高祖仕隋爲殿內少監時尚食奉御郭宏道善

相言於高祖曰公天中伏犀下接於眉此非人臣之相又案唐藝文志載韋無忝畫皇朝九聖圖宣和畫譜載唐陳閔寫唐列聖像又王肱寫唐帝眞閔開元時人所寫當是唐初諸帝

唐太宗像三軸 絹本一縱八尺六寸五分橫四尺設色畫立像長七尺四寸虬髯烏紗帽黃袍窄袖束帶革鞬 一縱二尺七寸橫一尺五寸半身像翼善冠龍袞 一縱三尺二寸橫一尺六寸立像長二尺幘頭赭袍玉帶上方題徐仲和臨閔立本畫唐太宗納諫圖并讚太宗堂堂天日表納諫受言心轉小鄭公凜凜社稷臣抗論輸忠殊不撓精神會合一堂上賢範英姿屹相向後來閭相寫其眞至今見者皆尊仰赭袍玉帶照面光烏鞬短笏唐人裝折腰上前進讜論忠膺義頗搖風霜

謹案舊唐書太宗紀高祖之臨岐州太宗時年四歲有書  
生自言善相見太宗曰龍鳳之姿天日之表年將二十必  
能濟世安民矣又案段成式西陽雜俎太宗虬鬚嘗戲張  
挂弓矢又案玉海唐太宗寫真圖舊記開元十八年奚契  
丹犯塞六月丙子以肅宗爲河北道元帥命百僚於光順  
門相見張說謂學士孫逖韋述曰嘗見太宗寫真圖忠王  
雅類聖祖此社稷之福又案唐書車服志平巾幘弁服者  
朔日受朝之服也烏紗帽者視事及燕見賓客之服也太  
宗嘗以幘頭起於後周便武事方天下偃兵探古制爲翼  
善冠自服之制如幘頭又案納諫應君相竝圖觀題讚則  
圖中舊有魏徵不知何時割去耳

後唐莊宗像一軸

絹本縱八尺五寸五分橫四尺設色畫立

像長七尺五寸黑髻皁紗折上巾藍袍玉帶

謹案舊五代史唐莊宗紀唐光啓元年冬十月二十二日生姪時曹后嘗夢神人黑衣擁扇夾侍左右載誕之辰紫氣出于窗戶及爲嬰兒體貌奇特沈厚不羣武皇特所鍾愛及武皇之討王行瑜帝時年十一從行初令入覲獻捷迎駕還宮昭宗一見駭之曰此兒有奇表因撫其背曰兒將來之國棟也勿忘忠孝于予家

宋宣祖像二軸 絹本一縱六尺八寸橫四尺七寸七分設色畫坐像高四尺九寸微髻服冕被袞執圭 一縱一尺七寸橫一尺二寸八分設色畫半身像長髻幘頭黃袍左右方有題識漫漶

謹案宋史太祖祀祖敬歷營薊涿三州刺史敬生宏殷唐

莊宗時典禁軍漢韓祐中以討王景功遷護聖都指揮使  
周顯德中從征淮南平揚州加檢校司徒封天水縣男是  
爲宣祖又案宋輿服志天子有大裘冕冬至祀昊天上帝  
立冬祀黑帝立冬後祀神州地祇服之

宋太祖像四軸 絹本一縱八尺一寸橫四尺設色畫立像長  
七尺三寸長髯幘頭紫袍皁紋鞞 一縱七尺橫五尺三寸設  
色畫坐像高五尺三寸幘頭黃袍朱帶 一縱一尺八寸五分  
橫一尺八寸設色畫半身像幘頭白袍上方標題趙太祖收傳  
印記瓢印一隴西記 一縱一尺六寸橫一尺一寸五分設色  
畫半身像幘頭緋袍執仗

此疑作都  
點檢時像

謹案宋史帝紀太祖宣祖次子母昭憲皇后杜氏帝容貌  
雄偉氣度豁如又案宋史輿服志幘頭一名折上巾起自

後周然止以軟帛垂腳隋始以桐木爲之唐始以羅代繒  
惟帝服則腳上曲人臣下垂五代漸變平直國朝之制君  
臣通服平腳其初以藤織草巾子爲裏紗爲表而塗以漆  
後惟以漆爲堅去其藤裏前爲一折平施兩腳以鐵爲之  
又云衫袍唐因隋制天子常服赤黃淺黃袍衫折上巾九  
還帶六合鞞宋因之有赭黃淡黃襖袍紅衫袍常朝則服之  
鞞大宴則服之又有赭黃淡黃襖袍紅衫袍常朝則服之  
又有窄袍便坐視事則服之皆阜紗折上巾通犀金玉環  
帶窄袍或御烏紗帽中興仍之又案宋史禮志神御殿古  
原廟也以奉安先朝之御容太祖神御之殿七太平興國  
寺開先殿景靈宮應天禪院西院南京鴻慶宮承安縣會  
聖宮揚州建隆寺章武殿滁州天慶寺端命殿又案李心

傳建炎以來朝野雜記成都府新繁縣御容殿者始在重  
光寺藥師院雍熙閒僧道輝畫太祖皇帝御容于佛屋之  
後壁又案邵伯溫聞見前錄太祖微時游渭川潘原縣過  
涇州長武鎮寺僧守嚴者異其骨相使畫工圖於寺壁青  
巾褐裘天人之相也又案文獻通攷天聖初知制誥張師  
德奉安太祖御容于鴻慶宮八年迎天章閣太祖御容奉  
安于太平興國寺開先殿景祐四年奉安太祖御容于揚  
州建隆寺慶歷六年重脩開先殿迎天章閣太祖御容奉  
安八年自萬壽觀奉太祖御容于睦親宅皇祐五年奉太  
祖于滁州天慶觀端命殿至和二年迎太祖御容奉安開  
先殿

宋太宗像一軸 絹本縱三尺三寸橫一尺四寸五分設色畫



立像長二尺二寸黑髻幘頭黃袍褰袖

謹案宋史帝紀太宗宣祖第三子太祖同母弟帝幼不羣及長隆準龍顏望之知爲大人儼如也又案宋史禮志太宗神御之殿七啓聖禪院壽寧堂景福殿鳳翔上清太平宮并州崇聖寺統平殿及西院鴻慶宮會聖宮又案文獻通攷天聖初奉安太宗御容于鴻慶宮明道二年迎龍圖閣太宗御容奉安壽寧堂慶歷八年自萬壽觀奉太宗御容于睦親宅皇祐五年奉太宗于并州資聖院統平殿至和二年迎太宗御容奉安永隆殿又案宣和畫譜武宗元喜丹青嘗於西京上清宮畫三十六天帝其間赤明和陽天帝潛寫太宗御容以宋火德王故也眞宗幸上清宮忽見御容驚曰此眞先帝也遽命焚香再拜又案名畫評釋

元靄蜀中人能寫真太宗聞之召元靄傳寫時上幸後苑賞春方還烏巾插花天姿和暢靄一揮而成略無凝滯上優賜之章聖卽位詔靄寫先帝側座御容恩賜甚厚圖畫見聞志牟谷善傳寫太宗朝爲圖畫院祗候眞宗幸建隆觀谷乃以所寫太宗正面御容張於戶內上見之勅中使收赴行在詰其所由谷具以實對上命釋之時太宗御容已令元靄寫畢乃更令谷寫正面御容尋授翰林待詔能寫正面惟谷一人

宋眞宗像二軸 絹本一縱六尺五寸橫三尺六寸設色畫坐像高四尺五寸微髻幘頭赭袍皁紋鞞 一縱二尺五寸橫一尺九寸設色畫半身像幘頭白袍朱領朱帶

謹案宋史帝紀眞宗太宗第三子母元德皇后李氏帝幼

英睿姿表特異又案宋史禮志眞宗神御之殿十有四景  
靈宮奉眞殿玉清昭應宮安聖殿洪福院壽寧堂福聖殿  
崇先觀永崇殿萬壽觀延聖殿澶州信武殿西京崇福宮  
保祥殿華州雲臺觀集眞殿及西院鴻慶宮會聖宮鳳翔  
太平宮又案文獻通攷天聖初迎景靈宮眞宗御容奉安  
于西京應天院景靈舊晉邸眞宗所生二年又建殿于上  
清太平宮奉安御容又出御容奉安洪福院四年出御容  
奉安鴻慶宮五年天章閣迎御容奉安慈孝寺崇眞殿九  
年永安縣建會聖宮奉安三聖三聖謂太祖眞宗明道二年迎  
景福殿眞宗御容奉安福聖殿慶歷八年自萬壽觀奉眞  
宗御容于天章閣皇祐五年滁州通判王靖請滁并澶三  
州建殿以奉神御卽芳林園命工寫三聖御容又案李燾

長編眞宗大中祥符五年得錫慶院吉地令丁謂等脩建  
詔上新宮名曰景靈又神宗元豐五年詔景靈宮奉眞廣  
孝孝嚴英德殿慈孝寺崇眞彰德殿普安禪院隆福殿御  
容十月丁丑告遷入內奉先資福禪院慶基殿太平興國  
寺開先殿啓聖院永隆殿崇先觀永崇殿普安禪院重徽  
殿御容十一月壬子告遷入內先是祖宗神御殿分建於  
諸寺觀上以爲未足以稱嚴奉之義乃酌原廟之制卽景  
靈宮建十一殿每歲孟月朝享以盡時王之禮此北宋崇  
祀神御于景靈宮之大略也玉海紹興十年六月高世則  
爲景靈宮使十三年二月建三殿聖祖居前宣祖至徽宗  
居中昭憲而下二十一人居後九月奉安列聖神御十八  
年五月增建景靈宮於太一宮齋殿後地自後欽高孝光

寧理之帝后神御殿以次遞建此南宋崇祀神御于景靈宮之大略也又案名畫評王端長於傳寫寫真廟御容無及之者

宋仁宗像一軸 絹本縱五尺九寸橫四尺設色畫坐像高五尺微鬢幘頭赭袍

謹案宋史帝紀仁宗真宗第六子母李宸妃章獻皇后無子養爲己子性仁孝寬裕喜慍不形於色又案宋史禮志神御殿以奉安先朝之御容仁宗英宗神宗哲宗四朝神御于景靈宮應天院又案玉海治平元年三月作仁宗神御殿于景靈宮西園八月成名曰孝嚴十二月御篆孝嚴殿額二年四月丙午奉安仁宗御容又案遼史耶律裏履工畫以寫真召拜同知南院宣徽事使宋賀正寫宋仁宗

容以歸又案通鑑輯覽嘉祐二年九月契丹來聘遣翰林學士胡宿報之初契丹主來求御容會卒乃已至是復遣使來求宿乃奉御容如契丹契丹主具儀仗迎謁及瞻視驚肅再拜謂左右曰我若生中國不過與之執鞭持蓋一都虞候耳又案圖畫見聞志釋維眞嘉禾人工傳寫嘗被旨寫仁宗英宗御容賞賚殊厚東坡詩集有贈寫御容妙善師詩所寫乃仁宗御容也

宋英宗像二軸 絹本一縱六尺四寸橫四尺九寸設色畫坐像高四尺五寸微髻幘頭白袍朱帶皁紋鞞 一縱二尺二寸橫一尺四寸半身像幘頭赭袍

謹案宋史帝紀英宗濮安懿王允讓第十三子生四歲仁宗取入宮養之嘉祐七年立爲皇子神宗紀熙寧二年春

正月奉安英宗神御于景靈宮英德殿又案宋史禮志熙寧二年知大宗正丞事李德芻言今宗室邸第並有帝后神御非所以明尊卑崇正統也詔諸宗室宮院祖宗神御迎藏天章閣自是臣庶之家凡有御容悉取藏禁中元豐五年作景靈宮十一殿而在京宮觀寺院神御皆迎入禁中所存惟萬壽觀延聖廣愛寧華三殿而已

宋神宗像二軸 絹本一縱五尺五寸橫三尺五寸五分設色畫坐像高四尺五寸幞頭朱袍卓紋鞞 一縱二尺五寸橫一尺八寸二分設色畫半身像微鬚折上巾絳羅袍頂有圓光謹案宋史帝紀神宗英宗長子母宣仁聖烈皇后高氏帝隆準龍顏動止皆有常度又案潛確類書元祐元年太皇太后詔神宗升祔於故事當營神御以奉神靈聞治隆殿

後有園地可卽其地立神宗原廟又案哲宗紀元祐二年三月奉安神宗神御於景靈宮宣光殿十月奉安神宗御容於會聖宮及應天院又案宋史禮志徽宗卽位宰臣請特建景靈西宮奉安神宗於顯承殿爲神御之首

宋哲宗像一軸 絹本縱五尺六寸橫四尺五寸設色畫坐像高四尺八寸面瘦削微鬚幘頭朱袍

謹案宋史帝紀哲宗神宗第六子母欽聖皇后朱氏帝天表粹溫進止中度徽宗紀元符三年八月奉安神宗神御建哲宗神御殿於其西崇寧二年二月奉安哲宗御容於西京會聖宮及應天院又案宋史禮志建中靖國元年名哲宗神御殿曰觀成尋改重光

宋徽宗像二軸 絹本一縱五尺九寸橫三尺三寸五分設色



畫坐像高四尺六寸微髻朱帽朱衫 一縱二尺四寸五分橫一尺六寸設色畫半身像紗方巾露髻朱衣朱帶

謹案宋史帝紀徽宗神宗第十一子母欽慈皇后陳氏元符三年正月哲宗崩皇太后謂宰臣曰大行皇帝無子帝嘗言端王有福壽且仁孝乃召端王入卽皇帝位於柩前又案宋史禮志紹興十五年秋營建神御殿於崇政之東其殿名徽宗曰承元欽宗曰端慶

宋欽宗像二軸 絹本一縱五尺九寸橫三尺四寸五分設色畫坐像高四尺九寸微髻幘頭朱袍朱履 一縱三尺二寸橫一尺六寸五分半身像藍巾淺綠衫

謹案宋史帝紀欽宗徽宗長子母恭顯皇后王氏政和五年立爲皇太子宣和七年十二月徽宗下詔禪位又案咸

淳臨安志景靈宮在新莊橋之西紹興十三年詔臨安府

同脩內司相度脩葢卽劉光世家所獻賜第基爲之前爲

聖祖殿宣聖至徽宗皇帝殿居中

攷中興編年紹興三十一年八月淵聖凶問至

詔臣民發哀成服廟號欽宗遙稱獻陵明年間東西廊圖

二月附木主於太廟時欽宗猶存故不設殿也配饗功臣於壁殿各有名旣成七月上行款謁禮時神御

猶在溫州乃設幄行事十月吏部侍郎江邈始奉迎以至

二十一年詔廣殿宇韓世忠家復以賜第獻遂增建前殿

五楹中七楹後十七楹又欽先孝思殿紹興十五年建循

東都舊制以奉祖宗神御又天章閣自東京時以奉列聖

御容中興以來駕所幸處必擇地安奉恭稱曰天章閣神

御紹興二十四年十一月始討論制度重建天章一閣而

諸閣所藏皆在其中白龍圖至顯文之閣凡二十四字合

爲一扁岳珂刻錄中興後天章閣不以除官蓋不特天  
字非臣下稱呼亦以神御所在不可與他閣例言也又寧  
壽觀在七寶山有徽宗欽宗神御元在禁中迎奉於此又  
案建炎以來朝野雜記天章閣以奉畫像時節朔望帝后  
生辰日皆徧薦之內臣行事欽先孝思兩殿亦奉神御上  
日焚香而諸陵之上宮亦有御容時節酌獻如天章閣  
宋高宗像一軸 絹本縱五尺八寸橫三尺二寸二分設色畫  
坐像高四尺六寸白鬚眉神清格挺幘頭朱袍阜紋鞞以下六  
像冠服皆同

謹案宋史帝紀高宗徽宗第九子母顯仁皇后韋氏建炎  
元年五月帝卽位千應天府治又案宋史禮志神御殿殿  
名高宗曰皇德又案劉一清錢塘遺事高宗誕之三日徽

宗幸慈寧后閣如嬪捧抱以見上撫視甚喜顧謂后妃曰  
浙臉也蓋慈寧后乃浙人其後駐蹕於杭亦豈偶然攷慈  
寧后卽顯仁韋皇后慈寧乃后所居殿名史稱后開封人  
遺事以爲浙人疑誤

宋孝宗像一軸 絹本縱六尺二寸橫三尺四寸設色畫坐像  
高四尺九寸微髻

謹案宋史帝紀孝宗太祖七世孫秀王子高宗未有後昭  
慈聖獻皇后勸立太祖後人爲嗣紹興二年選帝育於禁  
中三十二年立爲皇太子六年降御札皇太子可卽皇帝  
位朕稱太上皇帝又案宋史禮志神御殿殿名孝宗曰系  
隆又案建炎以來朝野雜記佑聖觀淳熙三年建以奉佑  
聖眞武靈應眞君十二月落成或曰眞武像蓋肖上御容

也

宋光宗像一軸 絹本縱五尺八寸橫三尺四寸設色畫坐像  
高四尺七寸微髻

謹案宋史帝紀光宗孝宗第三子母成穆皇后郭氏乾道  
七年立爲皇太子十六年二月傳位於太子如紹興三十  
二年受禪故事又案宋史禮志神御殿殿名光宗曰美明  
宋寧宗像一軸 絹本縱五尺八寸橫三尺四寸五分設色畫  
坐像高四尺六寸面清臞微髻

謹案宋史帝紀寧宗光宗第二子母慈懿皇后李氏光宗  
受禪封嘉王紹熙五年孝宗崩光宗以疾不能執喪宰相  
留正請立帝爲皇太子又案宋史禮志神御殿殿名寧宗  
曰垂光

宋理宗像二軸 絹本一縱五尺九寸橫三尺四寸設色畫坐像高四尺七寸貌豐碩黑鬚五綰 一縱二尺橫一尺二寸半身像

謹案宋史帝紀理宗太祖十世孫父榮王希瓚初寧宗弟沂王無嗣寧宗以帝嗣沂王賜名貴誠嘉定十七年八月寧宗疾甚丞相史彌遠稱詔以貴誠爲皇子閏月寧宗崩彌遠稱遺旨以帝嗣皇帝位又案宋史禮志神御殿殿名理宗曰章熙又案咸淳臨安志龍翔宮在後市街宮門之左曰福慶殿咸淳二年改爲理宗皇帝神御殿又案朱季三朝政要上初名與莒福州古田縣宗室父爲山陰尉縣人全氏以女妻之遂爲越人生理宗資貌龐厚號爲烏太係又案陳繼儒太平清話宋理宗御像郭蕭齋所寫

宋度宗像一軸 絹本縱六尺橫三尺四寸設色畫坐像高四尺七寸微髻

謹案宋史帝紀度宗父與芮嗣榮王理宗母弟也理宗無子屬意於帝寶祐元年立爲皇太子又案宋史禮志神御殿殿名度宗曰昭光又案陳繼儒祕笈度宗御像俞似齋寫又案徐充暖妹由筆杭州集慶寺有紙軸度宗小像

宋宣祖后像一軸 絹本縱六尺橫四尺七寸五分設色畫坐像高四尺三寸五分龍鳳冠鳳釵鞠衣加帔大帶雙綬玉佩玉環

謹案宋史后妃傳太祖母昭憲杜太后定州安喜人旣笄歸于宣祖太祖卽位尊爲皇太后又案 欽定續通志器服略宋制后之服有褱衣朱衣禮衣緣用翟爲章三等大

帶隨衣飾朱裏紕其外上以朱錦下以綠錦白玉雙佩大綬小綬施玉環惟鞠衣無翟文其首飾花十二株竝兩博鬢飾以九龍四鳳

宋眞宗后像一軸 絹本縱五尺六寸橫三尺七寸設色畫坐像高四尺六寸面羃絳紗九龍花釵冠兩博鬢翟衣帶綬環佩謹案宋史眞宗四后一章懷潘皇后大名人一章穆郭皇后太原人一章獻明肅劉皇后華陽人一章懿李皇后杭州人李后初入宮侍章獻太后眞宗以爲司寢生仁宗章獻以爲己子仁宗明道元年李疾革進位宸妃後章獻太后崩燕王爲仁宗言陛下乃李宸妃所生仁宗下哀痛之詔自責尊宸妃爲皇太后廟曰奉慈又卽景靈宮建神御殿曰廣孝又案文獻通攷明道二年慈孝寺莊憲卽章獻神



御爲彰德殿奉安御容景祐二年占宮城西北隅普安院奉安莊穆

即章穆

爲重徽殿皇祐五年葺重徽隆福殿奉安

章穆皇后今案宋后像各止一軸無標題不知此像屬何  
后因竝存之後仿此又案趙鼎建炎筆錄建炎三年十一  
月十九日出城奉迎萬壽觀神御卽眞宗皇帝章惠皇后  
及溫成皇后也步軍間勅自京師奉迎至攷章惠乃眞宗  
楊淑妃始仁宗在乳襁章獻使妃護視及卽位尊爲皇太  
后諡莊惠莊後攷章溫成乃仁宗張貴妃始納於章惠后  
宮寢皇祐初進貴妃薨仁宗追冊爲皇后諡溫成軸中眞  
宗四后仁宗二后旣竝列不當兼及追封者以旣奉迎有  
明文故附載焉

宋仁宗后像一軸 絹本縱五尺四寸五分橫五尺二寸設色

畫坐像高四尺六寸面貼珠鈿冠服同上旁列二侍女一執唾盂一執巾以下二像無侍女冠服面飾皆同

謹案宋史仁宗二后一郭皇后一慈聖光獻曹皇后郭后被廢此當是曹后像后眞定人景祐元年冊爲皇后英宗卽位尊爲皇太后神宗立尊爲太皇太后又案文獻通攷景靈東宮次西曰美成殿以奉仁宗皇帝山殿曰晨霄其後曰繼仁殿以奉慈聖光獻皇后山殿曰靈崑

宋英宗后像一軸 絹本縱五尺九寸二分橫四尺五分設色畫坐像高四尺三寸

謹案宋史英宗宣仁聖烈高皇后亳州蒙城人母曹氏慈聖光獻后姊也生神宗嘉祐八年冊爲后神宗立尊爲皇太后哲宗卽位尊爲太皇太后人以爲女中堯舜又案文

獻通攷景靈東宮又西曰治隆殿以奉英宗皇帝山殿曰昭清其後曰徽音殿以奉宣仁聖烈皇后山殿曰寧真

宋神宗后像一軸 絹本縱五尺四寸橫三尺六寸六分設色畫坐像高四尺一寸

謹案宋史神宗三后一欽聖憲肅向皇后河內人一欽成朱皇后開封人生哲宗一欽慈陳皇后開封人生徽宗又案宋史禮志建中靖國元年詔建欽聖憲肅皇后欽慈皇后神御殿于大明殿北名曰柔明尋改欽明又改坤元崇寧三年奉安欽成皇后神御坤元殿欽聖憲肅皇后之次欽慈皇后又次之又案宣和畫譜楊日言字詢臣開封人精寫貌神考識之拔擢爲左右傳寫古昔君臣賢哲繪像欽聖憲肅及建中靖國追寫欽慈皇太后儼然如生

宋哲宗后像一軸 絹本縱二尺五寸五分橫一尺六寸二分  
設色畫半身像高二尺一寸五分素髻藍衣

謹案宋史哲宗二后一昭慈聖獻皇后一昭懷劉皇后劉  
后自縊此像素服爲孟后無疑后洛州人元祐七年冊爲  
皇后紹聖三年詔廢后出居瑤華宮天下冤之元符末欽  
聖太后詔后還內號元祐皇后崇寧初再廢金人圍汴欽  
宗再復后尊爲元祐太后尋改隆祐紹興元年諡曰昭慈獻烈  
皇太后祔神主于哲宗室位在昭懷皇后上三年改諡昭  
慈聖獻又案靖康遺錄元祐皇后居瑤華宮近二十餘年  
緣金人破城移入舊城延寧宮自東瓦子經五樓歸私第  
是時太后脫身人亦不知其無恙故金人獨遺之又案秀  
水閒居錄元祐末哲宗方擇后京師里巷作打毬戲以一

擊入窠者爲勝謂之孟入于是孟在女應入宮之選至紹聖閒禁掖造纈有匠者姓孟獻樣兩大蝴蝶相對掩以纈帶曰孟家蟬民間競服之未幾后廢處瑤華宮號華陽教主玉清妙靜仙師議者以爲蟬者禪也出家之兆也靖康中京師失守皇族近屬皆詣虜營以后廢歲久無預時事不復取虜旣退邦昌請后入居延福宮今上踐阼迎后至睢陽上尊號曰隆祐皇太后建炎三年車駕至餘杭有苗劉之變后復垂簾以平內難至是前讖乃驗焉孟入者兩復入也禪者禪御兩地垂簾之應也大統中絕而復續天位暫傾而復正者后之力可謂異人矣又案張庚圖畫精意識聖母圖十幅元王振朋作前有阿沙不花等題筆至大三年冬十月皇上朝興聖宮上皇太后尊號宴臣阿沙

不花等於五花殿中蒙皇太后手示臣等王振朋所進歷代聖母賢妃圖十冊一周宣王姜后二漢章帝皇太后馬氏三漢和帝后鄧氏四漢成帝婕妤班氏五唐太宗后長孫氏六唐太宗徐惠妃七宋太祖母杜氏八宋仁宗后曹氏九宋英宗后高氏十宋哲宗廢后孟氏據此冊自周迄宋擇四朝繪八母后宋有其四而孟后得預焉則后之賢聲且遠播於敵國矣

宋徽宗后像一軸 絹本縱五尺八寸五分橫三尺三寸設色畫坐像高四尺五寸五分九龍花釵冠兩博鬢翟衣帶綬環佩面貼珠鈿以下三像冠服面飾皆同

謹案宋史徽宗三后一顯恭王皇后開封人建中靖國元年追冊一顯肅鄭皇后開封人崇寧初封賢妃遷貴妃王

皇后崩立爲皇后欽宗受禪尊爲太上皇后汴京破從上  
皇幸青城北遷五國城一顯仁韋皇后開封人高宗母也  
累封龍德宮賢妃從上皇北遷建炎改元遙尊爲宣和皇  
后紹興十年遙尊爲皇太后金人來議和高宗曰太后果  
還誓當守約金主許之十二年八月至臨安入居慈寧宮  
又案玉海景靈宮徽宗后顯恭顯肅顯仁殿曰順承又案  
文獻通攷紹興十三年景靈宮成十月遣官自溫州奉迎  
神御至上乃詣天章閣西殿告遷徽宗及顯恭顯肅二神  
御并奉安焉

宋欽宗后像一軸 絹本縱五尺九分橫三尺三寸七分設色  
畫坐像高四尺三寸

謹案宋史欽宗仁懷朱皇后開封祥符人欽宗在東宮徽

宗臨軒備禮冊爲皇太子如欽宗卽位立爲皇后從帝北遷又案玉海景靈宮欽宗后仁懷殿曰纘德

宋高宗后像一軸 絹本縱五尺九寸橫三尺二寸設色畫坐像高四尺一寸

謹案宋史高宗二后一顯節邢皇后一顯聖慈烈吳皇后邢后高宗居康邸聘之封嘉國夫人從三宮北遷遙冊爲皇后此像當屬吳皇后又案建炎以來朝野雜記吳皇后京師人年十四入宮少長封新興郡夫人進婉儀時邢后在朔廷後宮惟后與婉儀爲上列而后讀書萬卷翰墨絕人自是寵遇日至顯仁太后来歸明年遂正位宮壺又案玉海景靈宮高宗后憲節憲聖殿曰章順又案珊瑚網吳緯善人物嘗爲皇太后傳神孝宗手捧絹格從旁跪覽焉



宋光宗后像一軸 絹本縱五尺四寸五分橫三尺四寸設色  
畫坐像高四尺一寸

謹案宋史光宗慈懿李皇后安陽人高宗聘爲恭王妃乾  
道四年生嘉王七年立爲皇太子妃太子卽位冊爲皇后  
性妒悍殺黃貴妃禁帝不朝重華宮又案玉海景靈宮光  
宗后慈懿殿曰光順

宋寧宗后像一軸 絹本縱五尺九寸橫三尺五寸設色畫坐  
像高四尺四寸冠服同上面無珠鈿

謹案宋史寧宗二后一恭淑韓皇后相州人一恭聖仁烈  
楊皇后會稽人恭淑皇后崩后頗涉書史性復機警帝竟  
立之又案玉海景靈宮寧宗后恭淑恭聖殿曰體德又案  
咸淳臨安志玉清宮在錢塘門外葛嶺紹定元年崇奉寧

宗皇帝恭聖仁烈皇太后神御旌德顯慶寺在小麥嶺今  
以奉恭聖仁烈皇太后神御

明太祖像十二軸 一絹本縱六尺三寸橫三尺一寸設色畫  
坐像高五尺二寸鳳眸龍頤黑誌盈面服冕垂旒被袞執圭  
一絹本縱六尺三寸橫三尺一寸設色畫坐像高五尺一寸冠  
服同前 一絹本縱六尺二寸橫三尺三寸設色畫坐像高五  
尺一寸烏紗折上巾織金盤龍袍 一紙本縱二尺六寸橫一  
尺五寸設色畫坐像高二尺二寸冠服同前 一紙本縱五尺  
三寸橫三尺一寸設色畫坐像高五尺皮弁織金盤龍袍 一  
紙本縱三尺三寸橫二尺設色畫半身像冠服同前 一紙本  
縱六尺橫三尺四寸設色畫坐像高五尺七寸折上巾黃袍絳  
履 一紙本縱五尺二寸橫三尺一寸設色畫坐像高四尺八

寸折上巾赭袍 一紙本縱三尺三寸橫二尺二寸白描半身

像折上巾盤龍袍 一紙本縱三尺三寸橫二尺白描半身像

冠服同前 一紙本縱三尺四寸橫二尺白描半身像皮弁盤

龍袍 一絹本縱八尺五寸橫五尺一寸設色畫坐像高四尺

八寸烏紗折上巾黃袍紫面虬鬚與前像迥異疑是成祖像誤題簽

謹案明史太祖高皇帝濠州鍾離人父世珍追尊淳皇帝母陳

氏追尊淳皇后洪武元年春正月卽皇帝位又案明史輿服志

洪武十六年定袞冕之制冕前圓後方元表纁裏前後各

十二旒旒五采玉十二珠五采纁十二就紅絲組爲纓鞋

纁充耳玉簪導袞元衣黃裳十二章日月星辰山龍華蟲

六章織於衣宗彝藻火粉米黼黻六章繡於裳圭長一尺

二寸皇帝皮弁服其制自洪武二十六年定皮弁用烏紗

冒之前後各十二縫每縫綴五采玉十二以爲飾玉簪導紅組綬其服絳紗衣皇帝常服洪武三年定烏紗折角向上巾盤領窄袖袍束帶閒用金琥珀透犀永樂三年更定冠以烏紗冒之折角向上其後名翼善冠袍黃盤領窄袖前後及兩肩各織金盤龍一帶用玉韉以皮爲之又案何喬遠名山藏明太祖日章天質鳳目龍姿聲如洪鐘奇骨貫頂又案毛奇齡彤史拾遺記臨淮郭山甫善相人上龍潛時嘗游臨淮過山甫家山甫自外至見上大驚急呼內治饌治畢夫婦捧匕箸侍上飲笑語甚歡中酒闔外戶跽曰公非常人也自愛嘗言鍾離有王者氣當在公矣上去山甫謂諸子若曹皆田舍郎爾而有封侯之相吾初疑之今始知以是也乃遣其二子從龍又案周暉吉金陵瑣事

陳遇善山水曾寫太祖御容李天麟祥符志孫文宗洪武三年召至京傳寫太祖御容金賚畫史會要沈希遠洪武中寫御容稱旨授中書舍人

明成祖像一軸 絹本縱六尺九寸橫四尺七寸設色畫坐像高四尺九寸面深赤虬髯頰旁別出二綰向上翼善冠黃袍地敷氍毹

謹案明史成祖文皇帝太祖第四子母孝慈皇后洪武三年封燕王貌奇偉美髭髯勇智有大略能推誠任人建文元年秋七月舉兵稱其師曰靖難四年六月都城陷王詣奉天殿卽皇帝位又案彤史拾遺記高皇后生成祖有龍見於寢又案畫史會要陳攜永樂中寫太宗御容稱旨

明仁宗像一軸 絹本縱三尺五寸橫二尺四寸設色畫坐像

高二尺二寸長髻冠服同上

謹案明史仁宗昭皇帝成祖長子母仁孝文皇后夢冠冕執圭者上謁寤而生帝永樂二十二年八月卽皇帝位

明宣宗像三軸 絹本一縱六尺九寸五分橫五尺五寸設色畫坐像高五尺面赤而髻冠服同上 一縱二尺二寸橫二尺七寸設色畫馬上像高七寸二分臂鷹而馳前有羣雁驚起蘆葦間 一縱一尺二寸橫九寸五分設色畫立像長三寸五分戎服挈鹿倚馬欲上後一鹿驚馳宣宗作回顧狀

謹案明史宣宗章皇帝仁宗長子母誠孝昭皇后生之前夕成祖夢太祖授以大圭曰傳之子孫永世其昌旣彌月成祖見之曰兒英氣溢面符吾夢矣永樂九年十一月立爲皇太孫仁宗卽位立爲皇太子洪熙元年六月卽皇帝

位

明英宗像一軸 絹本縱六尺五寸橫四尺八寸四分設色畫坐像高四尺四寸面微赤而髯翼善冠龍袞

謹案明史英宗睿皇帝宣宗長子母貴妃孫氏生四月立爲皇太子宣德十年方九歲卽皇帝位遵遺詔大事白皇太

后行

明憲宗像一軸 絹本縱六尺五寸橫四尺九寸設色畫坐像高四尺三寸髯貌豐偉冠服同上

謹案明史憲宗純皇帝英宗長子母貴妃周氏天順元年立爲皇太子八年正月卽皇帝位又案名山藏明憲宗廣額豐頤方面大耳目睛如漆光彩射人

明孝宗像一軸 絹本縱六尺五寸橫四尺九寸設色畫坐像

高四尺一寸豐髯負黼展冠服同上以下六像皆同

謹案明史孝宗敬皇帝憲宗第三子母淑妃紀氏成化六年七月生帝於西宮時萬貴妃專寵宮中莫敢言悼恭太子薨後憲宗始知之育周太后宮中十一年勅禮部命名大學士商輅等因以建儲請是年紀妃暴薨哀慕如成人十一月立爲皇太子二十三年九月卽皇帝位十月追諡母淑妃爲孝穆皇太后又案畫史會要蔣宥治中都御史朱瑄薦入京應制寫御容

明武宗像一軸 絹本縱六尺五寸五分橫四尺七寸設色畫坐像高四尺五寸五分微髻

謹案明史武宗毅皇帝孝宗長子母孝康敬皇后宏治五年立爲皇太子十八年五月卽皇帝位



明世宗像一軸 絹本縱六尺五寸橫四尺九寸設色畫坐像  
高四尺一寸微髻

謹案明史世宗肅皇帝憲宗孫父興獻王祐杭國安陸正  
德十四年薨帝襲封武宗崩無嗣慈壽皇太后與大學士  
楊廷和定策以遺詔迎王於興邸夏四月卽皇帝位又案  
沈德符野獲編西苑齋宮獨大高元殿以有三清像設至  
今崇奉尊嚴且往歲世宗脩元御容在焉故得不廢鈴山  
堂集嘉靖癸卯夏四月新作雩殿成其地匯以金海帶以  
瓊山規構宏偉地位肅嚴前爲雩禱之壇後爲太素殿以  
奉祖宗列聖神御

明穆宗像一軸 絹本縱六尺四寸橫四尺八寸設色畫坐像  
高四尺微髻

謹案明史穆宗莊皇帝世宗第三子母杜康妃嘉靖四十五年十二月卽皇帝位

明神宗像一軸 絹本縱三尺四寸五分橫二尺三寸五分設色畫坐像高三尺一寸微鬢

謹案明史神宗顯皇帝穆宗第三子母貴妃李氏隆慶二年立爲皇太子時方六歲六年六月卽皇帝位

明光宗像二軸 絹本一縱六尺三寸五分橫四尺設色畫坐像高三尺八寸五分微鬢 一縱三尺四寸橫二尺四寸設色畫坐像高一尺九寸

謹案明史光宗貞皇帝神宗長子母恭妃王氏萬曆二十九年立爲皇太子四十八年八月卽皇帝位九月崩在位一月

明熹宗像二軸 絹本一縱六尺四寸橫四尺九寸設色畫坐像高三尺六寸黼展冠服同上旁二几陳設瓶鑪書策 一縱三尺四寸橫一尺三寸五分設色畫坐像高一尺九寸黼展冠服陳設並同

謹案明史熹宗愍皇帝光宗長子母選侍王氏萬歷四十八年神宗遺詔皇長孫及時冊立未及行光宗崩遺詔皇長子嗣皇帝位又案孫承澤春明夢餘錄景神殿在太廟東北奉藏列聖御容每歲六月六日本寺具吉服詣太廟暨景神殿曬晾

明興獻王像二軸 絹本一縱七尺四寸橫五尺二寸設色畫坐像高五尺二寸黑鬚 一縱三尺四寸橫二尺四寸設色畫坐像俱負黼展翼善冠龍袞

謹案王鴻緒明史藁諸王傳與獻皇帝祐杭憲宗第四子  
成化二十三年封興王安治四年建邸安陸正德十四年  
薨諡曰獻武宗崩召世子入嗣是爲世宗禮臣援漢定陶  
宋濮王故事考孝宗改稱祐杭爲皇叔父興獻大王進士  
張璁請帝興獻帝大悅嘉靖三年三月加稱爲本生皇考  
恭穆獻皇帝七月諭去本生號九月詔伯孝宗兄武宗尊  
陵名顯陵廟號睿宗祔太廟此像冠服皆同帝制簽稱興  
獻王者乃屬後來改題于此可推見當日議禮之是非而  
宋濮議之是非亦定矣

明孝慈高皇后像一軸 紙本縱三尺三寸五分橫二尺三寸  
五分設色畫半身像龍鳳冠鞠衣加帔

謹案明史太祖孝慈高皇后馬氏宿州人父馬公母鄭媼

早卒帝封馬公徐王鄭媼爲王夫人脩墓置廟焉又案明  
史輿服志皇后常服洪武三年定雙鳳翊龍冠首飾釧鐲  
用金玉珠寶翡翠諸色團衫金繡龍鳳文帶用金玉四年  
更定龍鳳珠翠冠眞紅大袖衣霞帔紅羅長裙紅褙子冠  
製如特髻上加龍鳳飾衣用織金龍文加繡飾

漢韓信像一軸

以下二十一軸皆內務府廣儲司茶庫收貯今附入

絹本縱八尺五寸

六分橫三尺九寸設色畫立像長七尺二寸髻五綰眉宇飛揚  
武弁戎服佩劒

謹案唐書禮樂志上元元年尊太公爲武成王以歷代良  
將爲十哲像坐侍列於左者有漢淮陰侯韓信列於右者  
有漢太子少傅張良

漢張良像一軸

絹本縱六尺五寸五分橫三尺二寸設色畫

立像長四尺九寸五分微鬢巾服大帶有裳

謹案史記張良傳余以爲其人計魁梧奇偉至見其圖狀貌如婦人好女蓋孔子曰以貌取人失之子羽畱侯亦云又案中興館閣續錄載不知名氏畫古賢軸中有畱侯像漢周亞夫像一軸 絹本縱八尺五寸五分橫四尺設色畫立像長七尺鬢三綰束髮巾緋袍革帶

謹案唐書禮樂志建中三年武成王廟圖形古今名將六十四人有漢太尉條侯周亞夫

漢寇恂像一軸 絹本縱八尺五寸五分橫四尺設色畫立像長七尺眉宇英毅巾幘藍袍

謹案後漢書永平中顯宗追感前世功臣乃圖畫二十八將於南宮雲臺中有執金吾雍奴侯寇恂征南大將軍舞

陽侯岑彭征虜將軍潁陽侯祭遵

漢岑彭像一軸 絹本縱八尺五寸五分橫四尺設色畫立像  
長七尺有鬚武弁紫袍叉手

漢祭遵像一軸 絹本縱八尺五寸五分橫四尺設色畫立像  
長七尺鬚三綰黑介幘緋袍束帶

漢班超像一軸 絹本縱八尺五寸五分橫四尺設色畫立像  
長七尺虬鬚怒目巾幘拱手青袍革帶

謹案後漢書班超爲人有志行詣相者曰祭酒布衣諸生  
耳而當封侯萬里之外超問其狀相者指曰生燕領虎頭  
飛而食肉此萬里侯相也

漢諸葛亮像一軸 絹本縱六尺一寸橫三尺設色畫立像長  
五尺有鬚綸巾緇衣繫裳上方題炎劉失馭漢轍傾東遺世躬

耕草廬隆中昭烈三顧幡然景從跨荆益以保崑阻走曹瞞司  
馬而角逐羣雄魚復之石八陣不移赤壁之戈一揮懋功拜表  
出師神行電邁誠動天地氣凌雲風曠百世貫古今而不可度  
思夫是爲南陽之臥龍敬德堂書鈐印三敬德堂章晉府圖書  
冰清玉潔南陽龍臥炎劉傾否三顧草廬幡然而起義正君臣  
恩猶魚水肆七縱以征蠻麾八陣於頤指氣吞吳魏巋然鼎峙  
據五丈原走生仲達嗚呼天不憖遺長星墜矣吳從敬鈐印五  
豫章

二字漫漶

琴寓圖書吳氏從敬正肅公裔一印不可辨

謹案三國志蜀書諸葛亮傳注引襄陽記曰亮初亡所在  
各求爲立廟朝議以禮秩不聽百姓遂因時節私祭之於  
道陌上言事者或以爲可聽立廟於成都後主不從步兵  
校尉習隆中書郎向充等其上表曰臣聞周人懷召伯之



德甘棠爲之不伐越王思范蠡之功鑄金以存其像自漢興以來小善小德而圖形立廟者多矣況亮德範遐邇勳蓋季世王室之不壞實斯人是賴而蒸嘗止於私門廟像闕而莫立使百姓巷祭戎夷野祀非所以存德念功述追在昔者也臣愚以爲宜近其墓立之於沔陽使所親屬以時賜祭凡其臣故吏欲奉祠者皆限至廟斷其私祀以崇正禮於是始從之

漢張飛像一軸 絹本縱八尺五寸五分橫四尺設色畫立像長七尺目眦欲裂鬚髯怒張介幘白袍衷甲叉手左腕懸鐵鞭

一

謹案唐書禮樂志建中三年武成王廟圖形古今名將有蜀車騎將軍西鄉侯張飛前秦丞相王猛

秦王猛像一軸 絹本縱八尺五寸五分橫四尺設色畫立像  
長七尺髻髯黑幘藍袍拱手

謹案晉書王猛傳猛瓌姿偉博學好兵書謹重嚴毅氣  
度雄遠

唐李孝恭像一軸 絹本縱七尺一寸橫三尺二寸設色畫立  
像長六尺六寸短髯服蟒腰玉

謹案舊唐書宗室河閒王孝恭傳武德二年拜孝恭爲總  
管令習水戰以圖蕭銑銑出降高祖大悅使畫工貌而視  
之又案唐書秦瓊傳河閒王孝恭開府儀同三司鄂國公  
敬德竝圖形凌煙閣藝文志凌煙閣功臣二十四人圖閣  
立本畫又有曹元感畫凌煙閣又案禮樂志武成王廟圖  
形名將有唐司空河閒郡王孝恭

唐尉遲敬德像一軸 絹本縱七尺一寸橫三尺二寸設色畫立像長六尺六寸睥目蒼髯武巾淺紫袍執笏

謹案唐書禮樂志武成王廟圖形名將有唐右武侯大將軍鄂國公尉遲敬德

唐薛仁貴像一軸 絹本縱八尺五寸五分橫四尺設色畫立像長七尺髯髯白袍衷甲叉手右腕懸鐵鞭一

謹案唐書薛仁貴傳王師攻安市城仁貴恃驍悍欲立奇功乃著白衣自標顯持戟腰鞬兩弓呼而馳所向披靡帝望見遣使馳問先鋒白衣者誰曰薛仁貴帝召見嗟異賜金帛口馬甚衆

唐狄仁傑像一軸 絹本縱八尺五寸五分橫四尺設色畫立像長七尺豐髯進賢冠紫袍執笏

謹案通鑑輯覽嘗有持狄梁公畫像及告身詣狄青獻之以爲青之遠祖青謝之曰一時遭際安敢自附梁公厚贈其人而還之

唐郭子儀像一軸 絹本縱八尺五寸五分橫四尺設色畫立像長七尺豐髯武巾紫袍執笏

謹案唐書郭子儀傳回紇吐番入寇代宗跳幸陝程元振說帝都洛陽子儀表諫帝得奏泣謂左右曰子儀社稷臣朕西決矣乘輿還子儀頓首請罪帝勞曰用卿晚至此乃賜鐵券圖形凌煙閣

唐李光弼像一軸 絹本縱八尺五寸五分橫四尺設色畫立像長七尺短髯帕首緋袍衷甲佩劍

謹案唐書李光弼傳浙東賊袁晁反光弼遣麾下破其衆

於衢州浙東平詔賜鐵券名藏太廟圖形凌煙閣

唐李晟像一軸 絹本縱八尺五寸五分橫四尺設色畫立像  
長七尺有髯武巾紫袍束帶拱手

謹案舊唐書武宗紀貞元五年九月詔以褚遂良已下至  
李晟等二十七人圖形於凌煙閣以繼國初功臣之像李  
晟傳貞元三年進拜太尉中書令明年詔爲晟立五廟他  
日與馬燧見延英帝嘉其勲下詔曰昔我烈祖體元御極  
作人父母則有熊羆之士不二心之臣左右經綸參贊締  
創昭文德開武功王業旣成太階旣平乃圖厥容列于凌  
煙閣永垂來裔厚莫重焉歲在己巳秋九月我行西宮瞻  
望崇構見老臣遺像禺然肅然和敬在色想雲龍之協期  
感政業之艱難覩往思今取類非遠且功與時並才與世

生苟蘊其才遇其時尊主庇人何代蔑有今顧晟等係寧  
朕躬咸宣力肆勤光復宗祏訂之前烈夫豈多謝闕而未  
錄孰旌厥賢況念功紀德文祖所爲也在予其曷敢怠有  
司宜敘先後各圖其像於舊臣之次命皇太子書其文以  
賜晟

唐李克用像一軸 絹本縱七尺一寸橫三尺二寸設色畫立  
像長六尺六寸面深亦豐髯冠折上巾絳袍玉帶

謹案舊五代史太祖武皇帝諱克用本姓朱耶氏乾寧二  
年十二月天子賜武皇爲忠貞平難功臣進封晉王莊宗  
卽位追諡武皇帝廟號太祖此像列于唐臣然冠服已僭  
同帝制矣又案陶岳五代史補太祖武皇生眇一目長而  
驍勇善騎射所向無敵時謂之獨眼龍大爲部落所疾遂

歸唐賜姓李武皇之有河東也威聲大振淮南楊行密常恨不識其狀貌使畫工詐爲商賈往河東寫之畫工到未幾人有知其謀者擒之武皇初甚怒旣而親謂曰吾素眇一目試召亟使寫之觀其所爲如何及至武皇按膝厲聲曰淮南使汝來寫吾眞必畫工之尤也寫吾不及十分卽階下便是死汝之所矣畫工再拜下筆時方盛暑武皇執八角扇因寫扇角半遮其面武皇曰汝諂吾也遽使別寫又應聲下筆畫其臂弓撚箭之狀仍微合一目以觀箭之曲直武皇大喜因厚賂金帛遣之

宋范仲淹像一軸 絹本縱四尺三寸橫二尺三寸五分白描坐像高八寸坐後設屏旁一童子焚香上方趙孟頫書款子昂印四大雅趙子昂氏趙孟頫印松雪齋

謹案宋史范仲淹傳爲政尚忠厚所至有恩邠慶二州之民與屬羌皆畫像立生祠事之又案趙孟頫所書係錢公輔義田記見宋文鑑

宋岳飛像一軸 絹本縱五尺七寸五分橫三尺一寸五分設色畫坐像高四尺九寸長髯藍巾蟒玉手執書策

謹案宋史岳飛傳紹興三年虔吉盜連寇循梅諸郡帝命飛平之密旨令屠虔州飛請誅首惡而赦脅從人感其德繪像祠之

明姚廣孝像一軸 絹本縱五尺七寸五分橫三尺七寸三分設色畫坐像服紫袈裟偏袒執拂趺坐上方金字標識勅封榮國恭靖公贈少師姚公廣孝眞容右題染衣而官蠅點冰顏以道反常慈波奚寬知公罪公星有定盤噶接得無初傳正脈從



來明暗不相參明萬歷壬辰冬十月望後四日題於潭柘山嘉福寺一音堂後學釋真可鈐印二漫漶左題官爾緇衣無覩爾顏非道非常法海自寬知我罪我我無定盤呵呵試看白雲閒出岫任他明月不相關辛丑秋江右心源居士和贊

謹案蔣葵長安客話京師有姚少師畫像面大方肥紅袍玉帶唐帽今榮國畫像猶是僧服姿容瀟灑雙睛如電光之燦嘉靖祀典嘉靖九年右中允廖道南奏太廟功臣配享永樂以來附以姚廣孝今大興隆寺有廣孝影堂像削髮披緇不可上比聖祖開國功臣之例乞爲釐正於是大學士張璠桂萼咸曰廣孝削髮披緇榮霑俎豆揆之義理實非所宜但係先朝功臣載在祀典合無移祀于大興隆寺春秋遣太常官致祭上是之告于皇祖太宗而行遣祭

文曰皇帝遣太常寺賜祭于榮國恭靖公贈少師姚廣孝  
曰當昔成祖文皇帝靖難之時爾克贊成祖以平多難成  
祖不爾棄與諸功臣并行封贈配食廟庭朕勅禮曹還爾  
位于茲寺中今特遣祭爾其歆承

南薰殿圖像攷卷上終

南薰殿圖像攷卷下

預脩

祕殿珠林

石渠寶笈三編唐文明鑑總纂翰林院編脩胡敬謹輯

歷代帝王像一冊

絹本三十七對幅每幅縱一尺三寸五分

橫一尺六分設色畫冠服半身像各像題識一太昊伏羲氏二

炎帝神農氏三黃帝軒轅氏四少皞金天氏五顓頊高陽氏六

帝嚳高辛氏七帝堯陶唐氏八帝舜有虞氏九禹十殷湯十一

周文王十二周武王十三漢高祖十四漢文帝十五漢景帝十

六漢光武十七漢昭烈十八吳大帝十九東晉元帝二十南朝

宋武帝二十一宋文帝二十二齊高祖二十三陳武帝二十四

梁武帝二十五隋文帝二十六唐高祖二十七唐太宗二十八

唐元宗二十九唐憲宗三十唐宣宗三十一閩王審知三十二

南唐後主李煜三十三宋太祖三十四宋仁宗三十五宋高宗

三十六宋孝宗三十七宋寧宗

謹案此冊自漢晉後宋齊陳梁隋五朝皆于德有慙而閩主王審知南唐後主李煜一偏霸一亡國其閒去取無義例可尋或因舊像留傳彙圖成冊歟又案此冊各幅分識帝王政績約三千言所錄皆紀載中語

宋代帝像一冊

絹本十六對幅

尺寸失記

左幅設色畫冠服半身

像右幅標題一宣祖二太祖三太宗四眞宗五仁宗六英宗七神宗八哲宗九徽宗十欽宗十一高宗十二孝宗十三光宗十四寧宗十五理宗十六度宗

謹案靖康之難宋高宗奉神御南渡故宣祖以下諸帝后像得規仿舊制崇祀景靈宮及各寺觀至臨安陷而徽欽諸帝后神御仍得與宣祖等像合藏燕京內殿者攷續通

鑑元平宋歲兩浙宣撫使焦友直以臨安經籍圖書陰陽祕書上于元此南北宋兩朝所由神御備在也

宋代后像一冊

絹本十二對幅

尺寸失記

左幅設色畫冠服半身

像右幅標題一宣祖后二眞宗后三仁宗后四英宗后五神宗后六哲宗后七徽宗后八欽宗后九高宗后十孝宗后十一光宗后十二寧宗后

謹案宋帝后已詳畫軸軸內闕孝宗后像今補宋史后妃傳孝宗三后一成穆郭皇后開封祥符人孝宗爲普安郡王時納焉生光宗及受禪追冊爲皇后一成恭夏皇后袁州宜春人郭氏薨太后以夏氏賜王卽位奉上皇命立爲皇后一成肅謝皇后丹陽人太后以賜王王卽位進貴妃  
淳熙三年上皇傳旨立爲皇后光宗受禪上尊號壽成皇

后孝宗崩尊爲皇太后又案玉海景靈宮孝宗后成穆成恭成肅殿曰嗣徽

元代帝像一册

絹本八對幅

失記

右幅設色畫半身像左空

幅各像簽題一太祖二太宗三世祖四成宗五武宗六仁宗七文宗八寧宗前數像皮冠幘衫後數像頂鉞笠服袍鉞笠綴以珠寶光彩章灼若古之會弁然

謹案元史帝紀太祖皇帝諱特穆津姓卻特氏蒙古部人太宗皇帝諱烏格台太祖第三子母光獻皇后鴻吉哩氏世祖皇帝諱呼必賚母莊獻皇后奇味氏成宗皇帝諱特穆爾世祖之孫太子珍戡第三子母鴻吉哩氏武宗皇帝諱哈尚世祖皇太子珍戡第二子達爾瑪巴拉之子成宗兄子母鴻吉哩氏仁宗皇帝諱阿裕爾巴里巴特喇武宗

母弟母鴻吉哩氏文宗皇帝諱圖卜特穆爾武宗次子明

宗弟也母唐古氏寧宗皇帝諱伊埒哲伯明宗子母鼐瑪

錦氏

以上名氏  
皆照譯改

又案倪燦炙研錄崇國寺有至正十四年

聖旨碑上序元諸帝皆用國語所云成吉思皇帝者太祖

也窩闊台皇帝者太宗也薛禪皇帝者世祖也完澤篤皇

帝者成宗也曲律皇帝者武宗也普顏篤皇帝者仁宗也

格堅皇帝者英宗也忽都篤皇帝者明宗也亦憐眞班皇

帝者寧宗也中不及文宗者後至元六年以帝謀不軌使

明宗飲恨而崩詔徹其廟主故碑文亦不書又案 欽定

續通志器服略元初立國冠服車輿並從舊制史志不載

其國俗可攷者天子積蘇冬之服凡十有一等服納奇實

奇淩則冠金錦暖帽服大紅桃紅紫藍綠寶里則冠七寶



重頂冠服紅黃粉皮則冠紅金答子暖帽服白粉皮則冠  
白金答子暖帽服銀鼠則冠銀鼠暖帽其上並加銀鼠比  
肩夏之服凡十有五等服塔納圖納奇實則冠寶頂金鳳  
釵笠服蘇布特圖納奇實則冠珠子捲雲冠服納奇實則  
帽亦如之服大紅珠寶里紅毛子塔納則冠珠緣邊釵笠  
服白毛子金絲寶里則冠白藤寶貝帽服駝褐毛子則帽  
亦如之服大紅綠藍銀褐金繡龍五色羅則冠金鳳頂笠  
各隨其服之色服金龍青羅則冠金鳳頂漆紗冠服珠子  
褐七寶珠龍答子則冠黃雅庫特寶貝珠子帶後簷帽服  
青蘇普金絲欄子則冠七寶漆紗帶後簷帽又案積蘇元  
史作只孫輿服志一色服也今蒙古語凡物之顏色謂之  
積蘇又作質孫元史帝師八思巴傳詔省臺院官以及百

司庶府竝服銀鼠質孫又案元史武宗紀至大四年閏七月仁宗卽位十月勅繪武宗御容奉安大崇恩福元寺延祐七年二月建御容殿于永福寺英宗紀至治元年二月作仁宗神御殿于普慶寺七月奉仁宗及帝御容于大聖壽萬安寺二年十月建太祖神御殿于興教寺泰定帝紀元年八月遣翰林學士承旨幹赤祀太祖太宗御容于普福寺文宗紀天歷元年十月幸大聖壽萬安寺謁世祖裕宗神御殿二年五月幸大聖壽萬安寺作佛事于世祖神御殿順帝紀至元元年命繪明宗御容六年正月奉太祖太宗睿宗三朝御容于石佛寺祭祀志至元十五年命承旨和禮霍孫寫太祖御容十六年復命寫太上皇御容與太宗舊御容俱置翰林院泰定四年造影堂于石佛寺未

及遷後至元六年翰林院言三朝御容祭所甚隘兼歲久屋漏于石佛寺新影堂奉安爲宜兵志延祐元年閏月隆禧院官言世祖影殿有軍士守之今武宗御容於大崇恩福元寺安置宜依例調軍衛守從之五行志至正二十八年六月甲寅大都大聖壽萬安寺災帝命百官救護惟東西二影堂神主及寶玩器物得免餘皆焚燬此寺舊名白塔自世祖以來爲百官習儀之所成宗時置世宗影堂於殿之西裕宗影堂於殿之東月遣大臣設祭又案王圻續通攷至正十四年立寧宗影堂

元代后像一冊 絹本十六對幅每幅縱一尺九寸橫一尺五寸八分右幅設色畫半身像左空幅各像標題一世祖皇帝后徹伯爾二順宗皇帝后塔濟三武宗皇帝后珍格四武宗皇帝

后五武宗皇帝后濟雅圖皇帝母六仁宗皇帝后七英宗皇帝  
后八英宗皇帝后九明宗皇帝后十寧宗皇帝后額森圖嚕默  
色十一后納罕十二至十五幅四后像無標題后像首服用紅  
羅束髮戔戔然極高至頂摺而下頂植小玉塔及彩羽前後綴  
珠翠花朵以帶繫髮際兩端下垂及肩又以金色羅紅托裏高  
寸許攏髻上綴大珠作葵花方勝樣覆髮際旁繞兩耳與耳環  
珠珮相接下承頤如瓔珞羅兩端後垂及肩再以紅羅抹額或  
方空有花微露鬢痕袍色大紅織金爲緣閒有紫與黃及茜色  
者

謹案世祖后元史表作昭睿順聖皇后名察必今譯改徹

伯爾順宗后

考順宗武宗父也爲世祖子名答剌麻入刺武宗卽位追尊曰昭聖衍孝皇帝廟號順宗

元史傳作昭獻元聖皇后名答已今譯改塔濟初爲順宗

如生武宗及仁宗武宗立尊爲皇太后武宗后元史傳作  
宣慈惠聖皇后名眞哥今譯改珍格又武宗后濟雅圖皇  
帝母濟雅圖元史作札牙篤爲文宗廟號考武宗三后又  
二如追尊爲后今像止存三一珍格一唐古氏卽文宗母  
其一標題未注明不知所屬仁宗凡二后一爲阿南達實  
哩皇后一爲達爾瑪實嘿皇后今像止存一英宗凡三后  
一爲蘇喀巴拉皇后一爲雅本呼圖克皇后一爲多爾濟  
巴勒皇后今像止存二明宗自溫綽寬皇后至瑪里達皇  
后凡八后今像止存一以上四像標題未注明不知所屬  
寧宗后元史傳作答里也忒迷失皇后元史語解作塔哩  
雅圖默色今標題作額森圖嚕默色此下一像標題止后  
納罕三字攷元史后如表傳無納罕皇后惟世祖有奴罕

皇后與納罕音相近然像次寧宗後則又非是後四像俱無標題不可攷矣又案永樂大典服字韻載蒙古冠服引析津志云罽罽以大紅羅幔之胎以竹涼胎者輕上等大次中次小用大珠穿結龍鳳樓臺之屬飾於其前後復以珠綴長條祿飾方絃掩絡其縫又以小小花朵插帶又以金釁事件裝嵌極貴寶石塔形在其上頂有金十字用安翎筒以帶雞冠尾出五臺山今眞定人家養此雞以取其尾甚貴罽罽後上插朵朵翎兒染以五色如飛扇樣先帶上紫羅脫木華以大珠穿成九珠方勝或疊勝葵花之類妝飾於上與耳相聯處安一小紐以大珠環蓋之以掩其耳在內自耳至頤下光彩眩人環多是大塔形葫蘆環或是天生葫蘆或四珠或天生茄兒或一珠又有速霞眞以

等西蕃納失今爲之夏則單紅梅花羅冬以銀鼠表納失  
今取其暖而貴重然後以大長帛御羅手帕重繫於額据  
此則諸后像之以紅羅束髮戔戔然者名罽罽以金色羅  
攏髻上綴大珠者名脫木華以紅羅抹額中現花紋者名  
速霞眞也伏讀 欽定續通志器服略后妃命婦首飾服  
章制度元后妃及大臣正室皆戴古庫勒衣大袍則罽罽  
當譯改古庫勒矣攷葉子奇草木子云元朝后妃皆帶姑  
姑高員二尺許用紅色羅蓋唐金步搖冠之遺制田朝恒  
增訂金壺字攷引席上腐談所云罽姑眞珠船所云顧姑  
輟耕錄聶碧窗所云固姑謂是一物誠然而以爲卽今婦  
女所戴挽頭一名盤圈以鐵絲爲之則擬不于倫良由未  
詳攷元代服制耳又案析津志云袍多是用大紅織金纏

身雲龍袍閒有珠翠雲龍者有渾然納失失者有金翠描

繡者有想繡者

想字疑誤

其於春夏秋冬金繡輕重單夾不等

其製極寬闊袖口窄以紫織金爪袖口纔五寸許窄卽大

其袖兩腋摺下有紫羅帶拴合于背腰上有紫撻繫但行

時有從女提袍此袍謂之禮服放草木子謂元代衣服貴

者用渾金線爲納失失或腰線繡通神襴然上下均可服

等威不甚辨据此則納失今納失失皆是金線所爲耳又

案元史泰定帝紀元年四月作昭聖皇后御容殿于善慶

寺順帝紀元統元年十月奉文宗皇帝及太皇太后御容

於大承天護聖寺祭祀志神御殿舊稱影堂所奉祖宗御

容世祖帝后大聖壽萬安寺成宗帝后大天壽萬寧寺武

宗及二后大崇恩福元寺仁宗帝后大普慶寺世祖武宗



影堂皆藏玉冊十有二牒玉寶一鈕仁宗影堂藏皇太子  
玉冊十有二牒皇后玉冊十有二牒玉寶一鈕世祖影堂  
有珍珠簾又皆有珊瑚樹碧甸子山之屬

元代后妃太子像一冊

紙本

內第二十四幅絹本

十四對幅縱一尺二寸

八分橫九寸四分設色畫半身像首幅無標題二仁宗皇帝后  
三英宗皇帝后四武宗皇帝后濟雅圖皇帝母五武宗皇帝后  
六明宗皇帝后七英宗皇帝后八后納罕九十一幅無標題  
十二空幅十三平王諾木干世祖皇帝第四子十四雅克特古  
思文宗太子后服飾詳前冊諾木干冠簷帽袍色大紅雅克特  
古思冠鈹笠袍色淺紅

謹案諾木干元史作那木罕元史語解作諾木罕攷元宗  
室世系表世祖十子次四北安王那木罕次七西平王奧

魯亦今標籤以諾木罕爲平王疑誤又元史表文宗三子  
次二燕帖古思太子蚤隕燕帖古思今譯改雅克特古思  
又案元史世祖昭睿順聖皇后傳后率宮人親執女功胡  
帽舊無前簷帝因射日色炫目以語后后卽益前簷帝大  
喜遂命爲式草木子元代官民皆帶帽其簷或員或前員  
後方或樓子蓋兜鍪之遺制又案元史文宗紀至順二年  
繪皇太子眞容奉安慶壽寺之東鹿頂殿鹿一作盤如累朝神  
御殿儀又案諸后世次應先武宗后次仁宗后次英宗后  
次明宗后今冊中先後失次當由重裝時紊其序耳

明代帝后像上冊

絹本十八對幅

尺寸失記

設色畫冠服半身像

各像簽題一明太祖高皇帝二孝慈高皇后三太宗文皇帝四  
仁孝文皇后五仁宗昭皇帝六誠孝昭皇后七宣宗章皇帝八

孝恭章皇后九孝惠皇后十英宗睿皇帝十一孝莊睿皇后十二孝肅皇后十三憲宗純皇帝十四孝貞純皇后十五孝宗敬皇帝十六孝康敬皇后十七武宗毅皇帝十八孝靜毅皇后

謹案明代后像見畫軸者止太祖孝慈高皇后一幅今照冊內標題補載 太宗仁孝文皇后徐氏中山王達長女

洪武九年冊爲燕王妃王卽位冊爲皇后生仁宗 仁宗誠孝昭皇后張氏永城人永樂二年冊爲皇太子妃生宣宗仁宗立冊爲后宣宗卽位上尊號曰皇太后英宗卽位加上太皇太后 宣宗孝恭章皇后孫氏入宮方十餘歲成祖命誠孝皇后育之成祖爲太孫選濟寧胡氏爲妃以后爲嬪宣宗卽位冊胡氏爲皇后而后爲貴妃貴妃子宮人子寵眷日重后上表遜位宣德三年冊立爲皇后子

爲皇太子是爲英宗十年二月英宗立尊爲皇太后廊王卽位尊爲上聖皇太后英宗復辟上徽號曰聖烈慈壽皇太后明興宮闈徽號自此始 孝惠皇后一像不知所屬案明史后妃傳有孝惠邵太后憲宗如興獻王母世宗入繼大統封爲皇太后卒葬茂陵謚曰孝惠皇后然世次當在孝貞純皇后下又案景帝廢后汪氏順天人正統十年冊爲廊王妃十四年王卽位冊爲皇后景泰三年廢正德元年薨議祭葬禮大學士王鏊曰葬以妃祭以后明年上尊謚曰貞惠安和景皇后此像或是景帝后疑不能定也英宗孝莊睿皇后錢氏海州人正統七年立爲后憲宗立稱爲慈懿皇太后以別於周太后又孝肅周太后英宗如憲宗生母憲宗卽位尊爲皇太后宏治十七年孝宗與

大學士劉健李東陽謝遷議立奉慈殿別祀不祔廟遂罷  
謚仍稱太皇太后嘉靖十五年遷后奉慈殿主與紀邵二  
太后並祀陵殿不繫帝謚以別嫡庶其後穆宗母孝恪神  
宗母孝定光宗母孝靖熹宗母孝和莊烈帝母孝純咸遵  
用其制 憲宗孝貞純皇后王氏上元人憲宗在東宮英  
宗爲擇配選后及吳氏留宮中及卽位左右爲吳地爲冊  
吳爲后吳后廢冊爲皇后孝宗卽位尊爲皇太后武宗卽  
位尊爲太皇太后 孝宗孝康敬皇后張氏興濟人成化  
二十三年選爲太子妃孝宗卽位立爲后武宗卽位尊爲  
皇太后世宗入繼用張璁議改稱伯母二十年八月上尊  
謚 武宗孝靜毅皇后夏氏上元人正德元年立爲后

明代帝后像下冊

絹本十六對幅

尺寸失記

設色畫冠服半身像

各像簽題一世宗肅皇帝二孝潔肅皇后三孝恪皇后四穆宗莊皇帝五孝慈莊皇后六孝安皇后七孝定皇后八神宗顯皇帝九孝端顯皇后十孝靖皇后十一光宗貞皇帝十二孝元貞皇后十三孝和皇后十四孝純皇后十五熹宗愍皇帝

謹案世宗孝潔肅皇后陳氏元城人嘉靖元年昭聖皇太后爲帝選婚得后立焉又孝恪皇后杜氏世宗妃穆宗生母大興人嘉靖初封康嬪進爲妃穆宗立加尊諡穆宗孝懿莊皇后李氏昌平人穆宗爲裕王冊爲妃生憲懷太子穆宗卽位加尊諡又孝安皇后陳氏穆宗次后通州人隆慶元年冊爲后又孝定皇后李氏穆宗妃神宗生母澧縣人初爲宮嬪進貴妃皇貴妃萬歷元年上徽稱曰慈聖皇太后又案彤管拾遺記孝定皇太后李氏神宗生母也

上嘗侍后慈寧宮看花時已秋節有銅盎生紅蓮蓮心抽蕊九而攢簇四向如臺蓮然上令文書官宋紳傳外廷觀看看畢仍送慈寧上親率后妃稱賀且賦詩以爲太后慈壽之瑞嘗于太后千秋節爲太后祈福勅取內庫所藏吳道子畫觀音像臨撫之易以慈容使梵刹瞻仰勒石刷千頁以布天下天下梵刹皆供之又案燕舟客話長椿寺大殿旁小室內藏佛像十餘軸中二軸黃綾裝裱與他軸異一繪九朵青蓮花捧一牌題曰九蓮菩薩之位明神宗母李太后也又案陳棕天啟宮詞注英華殿前菩提樹兩株爲李太后所植太后上賓神廟上尊號曰九蓮菩薩祀慈容于樹北之別殿神宗孝端顯皇后王氏餘姚人正位中宮者四十二年以慈孝稱又孝靖皇后王氏神宗妃光

宗生母初爲慈寧宮宮人帝過慈寧幸之有身十年四月封恭妃八月光宗生是爲皇長子三十四年元孫生加慈聖徽號進皇貴妃四十年病革光宗請旨得往看至宮門猶閉挾鑰而入后目眇手光宗衣而泣曰兒長大如此我死何恨遂薨諡溫肅端靜純懿皇貴妃熹宗卽位上尊諡

光宗孝元貞皇后郭氏順天人萬曆二十九年冊爲皇太子妃四十一年十一月薨諡恭靖熹宗卽位上尊諡又孝和皇后王氏光宗妃熹宗生母順天人初入東宮爲選侍生熹宗進才人四十七年三月薨光宗卽位追封皇貴妃熹宗卽位上尊諡又孝純皇后劉氏光宗妃莊烈帝生母海州人後籍宛平初入宮爲淑女萬曆三十八年十二月生莊烈愍皇帝已失光宗意被譴薨莊烈帝封信王進



賢妃及卽位上尊諡遷葬慶陵帝五歲失太后問左右遺像莫能得傳懿妃者舊與太后同爲淑女比宮居自稱習太后言宮人中狀貌有相類者命后母瀛國太夫人徐氏指示畫工可意得也圖成由正陽門具法駕迎入帝跪迎于午門懸之宮中呼老宮婢視之或曰似或曰否帝雨泣六宮皆泣又案燕舟客話長椿寺大殿旁小室內藏佛像十餘軸一繪女像具天人姿戴毘盧帽衣紅錦袈裟題菩薩號下注崇禎庚辰年恭繪烈皇生母孝純劉皇后也不知何時安奉寺內

至聖先賢像一冊 紙本一百二十對幅每幅縱一尺一分橫七寸六分設色畫冠服半身像各像簽題一大成至聖文宣王二克國復聖公顏同子淵三邨國宗聖公曾參子輿四沂國述

聖公孔伋子思五鄒國亞聖公孟軻六費公閔損子騫七鄆公  
冉耕伯牛八薛公冉雍仲弓九齊公宰予子我十黎公端木賜  
子貢十一徐公冉求子有十二衛公仲由子路十三吳公言偃  
子游十四魏公十商子夏十五陳公顓孫師子張十六單父侯  
宓不齊子賤十七金鄉侯澹臺滅明子羽十八高密侯公冶長  
子長十九任城侯原憲子思二十北海侯公皙哀季次二十一  
汝陽侯南宮适子容二十二曲阜侯顏無繇季路二十三萊蕪  
侯曾點原注又藏子皙二十四共城侯高柴子羔二十五須昌侯商  
瞿子木二十六壽張侯公伯寮子周二十七平輿侯漆雕開子  
若二十八鉅野侯公西赤子華二十九睢陽侯司馬耕子牛三  
十益都侯樊須子遲三十一平陰侯有若子有三十二千乘侯  
梁鱣叔魚三十三東阿侯巫馬施子旗三十四沐陽侯伯虔子

析三十五陽穀侯顏辛子柳三十六臨沂侯冉孺子魯三十七

上蔡侯曹卬子循三十八當陽侯任不齊子選三十九枝原本誤作

松江侯公孫龍子石四十高苑侯漆雕徒父子期四十一馮翊

侯秦商子丕四十二鄒原本誤作維平侯商澤子季案朱彝尊孔子弟子攷作子秀

四十三雷澤侯顏高子驕四十四濮陽侯漆雕哆子斂四十五

上邽侯壤駟赤子徒四十六諸城侯冉季子產四十七成紀侯

石作蜀子明四十八牟平侯原本脫侯字公良孺子正四十九鉅平

侯公夏守干乘原本守干乘三字誤作首柰二字五十梁父侯公肩定子仲朱氏

攷作子中五十一膠東侯后處子里五十二新息侯秦冉子開五十

三淦陽侯勾井疆五十四聊城侯鄔原本誤作鄔單子家五十五富

陽侯顏祖子襄五十六祁鄉侯罕父黑子黑朱氏攷作子素五十七濟

陽侯奚容蒧子皙五十八淄川侯申黨周五十九鄆朱氏攷作鄆城

侯秦祖子南六十厭次侯榮旂子祺六十一卽墨侯公祖句茲

子之六十二南華侯左人郢子行六十三河朱氏攷源侯燕伋

子思六十四樂平侯原亢原注又桃子藉六十五武成侯縣成子橫

六十六胸山侯鄭國子徒六十七寃句侯顏之僕子叔六十八

胙城侯廉潔子曹朱氏攷六十九建城侯樂欬原注又欣子聲七十

博平侯叔仲會子期七十一堂邑侯顏何子冉七十二高堂侯

邽選子飲原注又七十三林盧侯狄黑皙之七十四臨朐侯公

西輿如子之朱氏攷七十五鄆城侯孔忠子蔑七十六內黃侯

蘧瑗伯玉七十七徐城侯公西歲子上七十八長山侯林放子

止七十九臨濮侯施之常子恒八十南頓侯陳亢子禽八十一

華亭侯秦非子之八十二陽平侯琴張子開原注又八十三文

登侯申棖八十四博昌侯步叔乘子車八十五濟陰侯顏噲子

聲八十六泗水侯孔鯉八十七中都伯左邛明八十八蘭陵伯  
荀況八十九臨淄伯公羊高九十睢陽伯穀梁赤九十一乘氏  
伯伏勝九十二萊蕪伯高堂生九十三岐陽伯賈逵九十四樂  
壽伯毛萇九十五青城伯戴聖九十六彭城伯劉向九十七曲  
阜伯孔安國九十八成都伯楊雄九十九中牟伯鄭眾一百高  
密伯鄭元一百一緱氏伯杜子春一百二扶風伯馬融一百三  
良鄉侯應作伯盧植一百四新野伯范甯一百五滎陽伯服虔一  
百六任城伯何休一百七偃師伯王弼一百八司徒杜預一百  
九司空王肅一百十昌黎伯韓愈一百十一道國公周敦頤一  
百十二豫國公程顥一百十三洛國公程頤一百十四新安伯  
邵雍一百十五郿伯張載一百十六溫國公司馬光一百十七  
徽國公朱熹一百十八華陽伯張栻一百十九開封伯呂祖謙

一百二十魏國公許衡魯齋

謹案後漢書蔡邕傳光和元年置鴻都門學畫孔子及七十二弟子像史記索隱仲尼弟子傳引文翁圖記益州刺史張收畫盤古三皇五帝三代君臣與仲尼七十弟子於壁閒此至聖先賢圖形之緣起也唐書禮樂志武德四年詔州縣學皆作孔子廟貞觀二十一年詔左邱明卜子夏公羊高穀梁赤伏勝高堂生戴聖毛萇孔安國劉向鄭衆賈逵杜子春馬融盧植鄭康成服虔何休王肅王弼杜預范甯二十二人皆以配享開元八年詔十哲爲坐像悉預祀圖七十子及二十二賢於廟壁二十七年詔夫子旣稱先聖可諡曰文宣王贈諸弟子爵公侯伯始子淵兗公終公西蒧祝阿伯凡七十此至聖先賢封爵及後代諸儒從祀並圖形之緣

起也諸弟子之數或云七十或云七十二乃約舉大槩言之自漢藝文志論語家孔子徒人圖法二卷隋經籍志鄭康成論語孔子弟子目錄一卷書佚不傳其散見於史記家語會要通典諸書者率皆多寡不齊姓名互異今第就此冊所載以曝書亭集孔子弟子攷參訂之此冊所題封爵與宋史禮志所載約略相同惟宋史於顏曾思孟無復聖宗聖述聖亞聖名號又周敦頤爲汝南伯程顥爲河南伯程頤爲伊陽伯與此相異又此冊于呂祖謙下多許衡一人攷元史仁宗本紀皇慶二年以故中書左丞許衡從祀孔子廟庭文宗本紀至順元年加封顏子克國復聖公曾子邾國宗聖公子思沂國述聖公孟子鄒國亞聖公河南伯程顥豫國公伊陽伯程頤洛國公王圻續通攷延祐

六年追封周敦頤爲道國公與此冊正合蓋前乎此無許  
衡後乎此又增祀董仲舒楊時李侗胡安國蔡沈眞德秀  
諸人卽像位以追溯所繪之時必在元至順閒無疑矣又  
案顏高論語包注及釋文俱作顏刻史記弟子傳以刻爲  
高與左傳定八年挽強之顏高同名攷家語顏刻少孔子  
五十歲則生於定九年困學紀聞誤合爲一人非是又申  
枏卽申黨史記作申棠今史記作申黨釋文申枏鄭康成  
云孔子弟子申續家語亦作續今家語作績王應麟謂棠  
誤黨續誤績則申黨申枏申續乃一人宋祥符二年旣封  
申黨淄川侯復封申枏文登侯至明嘉靖閒始存枏去黨  
見明史禮志惟朱氏主二人之說與此冊同又別出魯申  
子續字子周攷史記申棠字周家語申續字周今魯申子



亦名續字子周歧而爲三此冊不載其人疑朱氏誤

聖君賢臣像一冊

紙本四十六對幅

尺寸失記

設色畫冠服半身

像各像簽題一伏羲

二神農

三黃帝

四少昊

五帝堯

六帝舜

七

夏禹八成湯

九文王

十武王

十一成王

十二宣王

十三漢高祖

十四文帝

十五景帝

十六武帝

十七宣帝

十八光武

十九明帝

二十蜀先主

二十一吳大帝

二十二晉武帝

二十三元帝

二十四明帝

二十五唐高祖

二十六太宗

二十七元宗

二十八德宗

二十九伯夷

三十叔齊

三十一太公望

三十二周公

三十三老

子三十四孔子

三十五顏子

三十六孫武子

三十七伍員

三十八

八孟子

三十九列子

四十莊子

四十一鬼谷子

四十二蘭相如

四十三屈原

四十四張良

四十五蕭何

四十六韓信

謹案冊中聖君與前歷代帝王像所載略同惟此冊不載

五代及宋卽唐以前亦小有詳略去取無甚義例至賢臣以孫武子鬼谷子與周呂孔孟並列尤屬不倫

歷代聖賢像一冊 紙本三十一對幅每幅縱一尺三寸五分橫一尺二分設色畫冠服半身像各像題識一倉頡二咎繇三后稷名棄四契五伊尹六傳說七太公姓姜氏名子牙八周公名旦九老子姓李氏名耳字伯陽諡曰聃十孔子名丘字仲尼十一屈原名平十二張良字子房十三東方朔十四董仲舒十五司馬遷字子長十六楊雄字子雲十七嚴子陵字光十八諸葛亮字孔明十九司馬懿字仲達二十王羲之字逸少二十一陶淵明晉名也在宋易名潛字元亮二十二謝靈運二十三檀道濟二十四昭明太子姓蕭氏名統字德施二十五文中子王通字仲淹二十六房元齡字喬二十七杜如晦字克明二十八

李靖字藥師二十九李勣字懋功三十尉遲敬德三十一狄仁  
傑字懷英三十二姚崇字元之三十三宋璟三十四顏真卿三  
十五郭子儀三十六李白字太白三十七杜甫字子美三十八  
韓文公名愈字退之三十九柳子厚名宗元四十白樂天名居  
易四十一孟東野名郊四十二賈島字浪仙四十三高太尉名  
瓊四十四包拯字希仁四十五劉雲莊名凝之四十六司馬光  
字君實四十七蘇東坡名軾字子瞻四十八黃山谷名庭堅字  
魯直四十九邵康節名雍字堯夫五十周濂溪名惇頤字茂叔  
五十一程明道名顥字伯淳五十二程伊川名頤字正叔五十  
三張橫渠名載字子厚五十四楊龜山名時字中立五十五岳  
鄂王名飛字鵬舉五十六朱晦菴名熹字元晦五十七張南軒  
名栻字敬夫五十八呂東萊名祖謙字伯恭五十九蔡西山名

元定字季通六十蔡九峰名沈字仲默六十一真西山名德秀  
字希元六十二許魯齋名衡

謹案此冊所繪皆賢相良將名儒文士其閒參以滑稽之  
東方朔跋扈之司馬懿殊屬不倫又案此冊各幅題識總  
計六千餘言皆取資史傳而郭子儀條下謂今廿世孫名  
南者世居上虞任常熟縣簿多能聲薦陞知縣著美政巡  
撫周亞卿翰林張脩撰爲作循良傳則叙及明代事矣其  
題識如鬼夜泣鬼誤兒九府園法園誤國齒若編貝貝誤  
具諸舛錯不勝枚舉是直鈔胥不知偏旁義訓者所書耳  
歷代聖賢名人像一冊 紙本四十五對幅每幅縱一尺三寸  
七分橫一尺設色畫冠服半身像各像簽題一周公二姜太公  
三楚三閭大夫屈原四戰國時楚蘭陵令荀况五漢相國鄧侯

蕭何六漢淮陰侯韓信七漢待詔東方朔八漢處士嚴君平九  
漢執戟侯楊雄十後漢高密侯鄧禹十一漢名醫華陀十二漢  
中郎將蔡伯喈十三蜀漢丞相忠武侯諸葛亮十四晉征南將  
軍杜預十五晉孫登十六晉阮咸十七晉太保建昌公謝安十  
八晉康樂公謝元十九隋大儒文中子王通二十宋丞相趙普  
二十一宋處士陳搏二十二宋丞相寇萊公準二十三宋丞相  
陳堯叟二十四宋韓魏公琦二十五宋丞相文潞公彥博二十  
六宋參政范文正公仲淹二十七宋參政歐陽文忠公脩二十  
八宋丞相司馬溫公光二十九宋丞相王荆公安石三十宋龍  
圖學士包孝肅公拯三十一宋提刑周敦頤三十二宋太常編  
校蘇洵三十三宋著作郎邵雍三十四宋監察御史程顥三十  
五宋崇政殿說書程頤三十六宋門下侍郎蘇文定公轍三十

七宋太史黃庭堅三十八宋太史秦觀三十九宋丞相周益公  
必大四十宋右文殿脩撰張栻四十一宋太史呂祖謙四十二  
宋大理寺丞黃幹四十三宋參政眞德秀四十四金學士趙景  
文四十五無簽題

謹案此冊繪宋賢獨詳而唐代不列一人未審何義外尚  
有唐名臣像冊或因裝治析而爲二亦未可知然核以簽  
題又不一例

唐名臣像一冊 紙本十一對幅每幅縱一尺四寸六分橫一  
尺三分設色畫冠服半身像各像簽題一房梁公二杜蔡公三  
李衛公靖四李英公五尉遲敬德六殷開山七王永寧公八魏  
鄭公九孫思邈十狄梁公十一唐尚父汾陽忠武王十二顏杲  
卿十三顏魯公十四唐翰林供奉李白十五唐劍南節度參謀

檢校工部員外杜甫十六唐太尉中書令西平王李晟十七陸宣公十八裴相國度十九韓退之二十柳公權二十一白樂天二十二南唐韓熙載

謹案此冊題識或書爵書官不書名或書官爵並書名或止書名或變書字既非褒貶不知其義例所從又案沈括筆談世人畫韓退之小面美髯乃江南韓熙載耳熙載諡文靖亦謂之韓文公因此謬爲退之退之肥而寡髯後世不復辨也此冊兩韓並列証以沈括所述信然

唐宋名臣像一冊 左絹本右紙本二十二對幅每幅縱八寸

五分橫六寸六分左幅設色畫冠服半身像右幅篆書標題一

長孫齊公無忌二魏鄭公徵三李衛公靖四陸宣公贇五裴晉

公度六王文正公旦七寇萊公準八張文定公齊賢九晏元獻

公殊十韓魏公琦十一富鄭公弼十二范文正公仲淹十三文

潞公彥博十四端明蔡公襄十五曾魯公公亮十六原父劉公

敞十七呂申公公著十八蘇文忠公軾十九曾文定公鞏二十

韓儀公忠彥二十一呂滎公希哲二十二元城劉公安世前副

頁隸書標題唐宋諸名臣像後副頁題跋右名臣畫像一冊唐

自李衛公宋自張齊公而下應作唐自長孫齊公宋自王文正公通二十二人諸

公勲德文章師表百世百世之下追思想象不可得而見者願

予小子乃得一旦肅容瞻拜于一堂之上何其幸哉宏治辛亥

萬壽節日吳郡李應楨在詹事府之後堂謹記鈐印二李姓印

貞白父

謹案此冊書爵書諡不書名今補注又案列卿記李應楨

名姓以字行更字貞伯長洲人景泰癸酉舉鄉試入太學



授中書舍人宏治中爲太僕少卿博學好古篆楷俱入格  
歷代武臣像一冊 紙本十五對幅每幅縱九寸三分橫七寸  
設色書冠服半身像各像簽題一周齊太公武成王二吳司馬  
孫武三越相國事范蠡四齊司馬田穰苴五魏河西太守吳起  
六齊軍師孫臏七秦武安君白起八秦大將軍王翦九晉太傅  
羊祜十晉司徒杜預十一唐西海道行軍大總管李靖十二唐  
太子太師李勣十三唐神兵應作道大總管蘇烈十四唐右領  
軍衛大將軍薛仁貴十五唐定襄道大都督裴行儉十六唐夏  
官尚書唐璿十七唐韓國公張仁愿十八唐尚書左丞相王峻  
十九唐饒州司馬郭震二十唐右金吾大將軍李嗣業二十一  
唐臨淮郡王李光弼二十二唐尚書令郭子儀二十三宋曹武  
穆二十四宋王全斌二十五宋狄樞密二十六宋劉光世二十

七宋韓蘄王二十八宋張魏公二十九宋張循王三十宋岳鄂王

謹案唐書禮樂志開元十九年始置太公尚父廟以留侯張良配上元元年尊太公爲武成王祭典與文宣王比以歷代良將爲十哲象坐侍秦武安君白起漢淮陰侯韓信蜀丞相諸葛亮尚書右僕射衛國公李靖司空英國公李勣列于左漢太子少傅張良齊大司馬田穰苴吳將軍孫武魏西河守吳起燕昌國君樂毅列于右此封太公爲武成王以十哲配之緣起也其後因十哲又增六十四配享建中三年詔史館攷定可配享者列古今名將自越范蠡至唐郭子儀凡六十四人圖形焉此歷代武臣彙像之緣起也嗣是或舉或廢宋建隆中則黜陟有議宣和中則封

爵有加乾道中復詔有司討論去取繪于殿廡元代從祀止孫武子以下十人至明初罷祀此冊所繪既稱太公爲武成王餘諸武臣亦皆唐宋以來曾從祀武成王廟者因祀有像因像核時雖其數與史所載多寡不符大約出自南宋人之手筆

明太祖御筆二冊

附

紙本

尺寸失記

所書皆硃筆諭旨草字難辨後

有楷書釋文

謹案劉繼五石瓠萬厯中閣臣申時行於故牘中得高皇帝御筆七十六道裝潢以進意當日頒發內外臣工御筆例不繳還故收藏家得以購求成函而宰臣因進之儒臣因釋之耳

明宣宗行樂圖一卷

絹本

尺寸失記

分六段設色畫宣宗便服簪

帽于御園坐觀射次觀蹴鞠次觀馬上抨丸次自捶丸次自投壺次乘步輦還宮皆有中涓給事左右

謹案卷中所圖簷帽若今冬帽式衣亦窄袖蓋輿服志常服猶是出見羣臣之禮服此則於燕居著之制無可攷宣宗善繪事于紙于爐于案皆有製造又愛促織嘗勅蘇州知府况鍾供進一千個見明典章是亦幾暇行樂之一証也

明人畫出警圖一卷 絹本縱二尺八寸四分橫八丈一尺四寸設色畫城闕崇坊桃柳廣陌卷盡處又見小城城外列橋二近山有碑亭有宮門山中松柏陰森殿宇高揭當是陵寢所在首列百官禮服送駕都門外次則羽林軍士執兵擁扈又次則鹵簿全備簫鼓鐃吹前後導從帝戎服乘介馬馬色黑白雜後

執蓋者二人左右乘馬捧劍者二人威儀之盛闐衢溢路凡爲人一千九十有九爲馬七百八十有五輦駕四象者一駕馬八者一十二人舁而行者一二十八人舁而行者一輅有四輪駕二十三馬者一輿用四馬駕者一用十二人舁者二車飾窗戶以朱者七加黃幄者三旌旗列樹營衛旁連不能悉舉

明人畫入蹕圖一卷 絹本縱二尺八寸四分橫八丈八尺五寸設色畫宮闕城闔橋梁衢陌大段與前圖相應惟以陸出以水旋布置稍異自山陵至小城從官皆乘馬由此易陸而水帝冠雙龍幘頭服龍繡紫袍當舟中正坐舟尾戎服持兵者六人前後朱服拱立者三人內監以篙進舟者五人旁一舟陳設花果雜物亦列兵衛後舟上加黃幄者二垂朱簾者四簫鼓鐃吹前行導迎者四羽林軍士執兵擁扈者六又前載朱色箱內監

放爆竹前引者二其黃幄肩輿象輦馬輦人輦暨步行鹵簿皆從岸上行前騶至西直門城坊署西直門三字百官禮服郊迎大橋下軍士各執械夾道鵠立至城止凡爲人九百一十有五爲馬三百七十有七舟二十車飾以朱者三旂旗仗具如前圖

謹案右二圖原簽不著何代 宮史定爲明世宗攷明史

帝紀嘉靖十七年十二月癸卯章聖皇太后崩

興獻王妃蔣氏世宗

母本生

十八年二月乙卯幸承天三月庚辰至承天辛巳謁

顯陵四月壬子至自承天五月甲申奉獻皇后梓宮於承天七月祔葬顯陵帝時居憂故謁陵御戎服以示變禮然旋蹕時太后猶未葬卽改御吉服者史稱禮部言歲除大行皇太后服制二十七日已滿適遇正旦朝會祭享一切吉儀所當酌議帝定於歲除日變服元色吉衣元旦祭服

於元極寶殿行告祀禮具翼善冠黃袍御殿百官公服致  
詞鳴鼓鐘鳴鞭奏堂上樂元旦御殿宜易吉而樂可不作  
世宗于禮制多獨斷故啓蹕用簫鼓鐃吹旋蹕則易服龍  
袞一如平時也又案明史橐河渠志通惠河卽大通河源  
出昌平白浮村神山玉泉過榆河會一畝馬眼玉泉繞甕  
山後匯爲七里灤東入都城西水門貫積水潭潭禁城西  
海子也成化七年尚書楊鼎侍郎喬毅上濬通惠河議言  
元時水在宮牆外舟得入城內海子灣今水從皇城金水  
河出故道不可復行惟玉泉龍泉及月兒柳沙等泉皆出  
西北循山麓而行可導入西湖請濬西湖之源引諸泉水  
從高粱河分其半由金水河出餘則從都城外壕流轉通  
惠帝從其請六年六月工成自大通橋至張家灣渾河口

六十餘里漕船稍通然不二載澀滯如舊嘉靖六年御史吳仲言通惠河元郭守敬所鑿後屢請脩復皆爲權勢所撓顧通流等八閘遺跡俱存因而成之爲力甚易大學士楊一清言省運軍勞費宜斷行之明年六月仲報河成帝以先朝屢勘行未卽功仲等四閱月工成詔予賞仲又請留督工郎中何棟專理其事從之九月擢棟右通政仍管通惠河道自此漕艘直達京師迄於明末據鼎毅言城西北諸泉水從都城外濠流轉通惠是明時西直門外有河道可達通惠河之明証而吳仲濬河正在嘉靖年間此世宗所以得汎舟運河抵西直門旋蹕也蘇天爵元名臣事略稱至元三十年秋車駕還自上都過積水潭見舳艫蔽水天顏開懌特賜都水監郭公錢緡仍以舊職兼提調通



惠河漕運事至元末至嘉靖初相距止二百餘載是時河道遺址未盡湮故濬治易爲功自明末都城西北屢被圍矢石之衝濠塹填塞而遺址遂無復存說者謂都城西北水不能流轉入通惠河毋乃囿于眉睫之見乎

南薰殿圖像攷卷下